

JNUHUN VAHA NI TEE SAN MARCOS

Jnūhun Juan tēe scuándute

(Mt. 3.1-12; Lc. 3.1-9, 15-17; Jn. 1.19-28)

¹ Yāha quéjéé jnūhun vāha máá Jesucristo Sēhe Yaā Dios, jeē ní quiji ya jeē jnama ya yohó.

² Isaías, tēe ni nacani jnūhun Yaā Dios nde jehahán, súcuan ni tee de jnūhun Juan nuū tútu: Tají rí tēe nacani jnūhun ri cosnūú de ichi núú rō, návāha coo tūhva ñayuu jeē jinú rō, achí Yaā Dios jíin Cristo.

³ Te tēe ún cana jee de nde nuū ñúhun téhé: Sátūhva ró máá ró jijnáhan ró, chi quee maá Jítoho yō.

Te sáha ró jniñu ndaā, chi vēji ya, achi de.

Achí Isaías.

⁴ Te Juan ni jinū de nde nuū ñúhun téhé, scuándute de ñayuu. Te cáhán de jíin i jeē na nácani ni i jeē stóo i cuēchi i te cuandute i, návāha cone cáhnu ni Yaā Dios nuū cuéchi i.

⁵ Te tāca ñayuu región Judea jíin ñayuu ñuu Jerusalén, ni quijicoo i nuū de. Te ni canacani ndaā i cuēchi i nuū Yaā Dios, te ni scuándute de i ini yūte Jordán.

⁶ Te sahma ñúhun Juan cúu ixi camello, te núhni ñin cinturón ñiñi chíji de. Te jeē técu de cúu tíca ndicuéhyí jíin ndúxi yocō.

⁷ Te suhva ni nacani de jnūhun:

Quiji máá Yaā cujéhnu ndasí. Chi tú na vé jéhnu cuiñi cúu ri nuū yā, ni jeē cuajniñu ri nuū yā vēsú

ɨn jniñu lúli gá nájnūhun jeē cuíta ndeyi ri ndají rí correa ndijēn yā.

⁸ Te ruhū chi jíin ndute scuándute ri rohó jíjnáhan ró, te Yaā ún chi nájnūhun jeē scuándute ya rohó cúu jeē cuáha ya Espíritu Santo condee ini anuá rō, achí Juan.

Jeē ní jendute Jesús

(Mt. 3.13-17; Lc. 3.21-22)

⁹ Te ni cuu jecu quivī, te Jesús ni quenda ya ñuu Nazaret ndañū Galilea, te Juan ni scuándute de ya ini yūte Jordán.

¹⁰ Te ná ni quenda ya nuū ndúte, te ni jito ya jeē ní nune-ni andiví, te ni cuun Espíritu Santo ni quee xinī yā, te cáa nájnūhun ɨn paloma.

¹¹ Te ichi ándiví ní cahān ɨn jnūhun:

Máá ró cúu Sēhe ri jeē maní ndasí rí jíin, te yōhyo cúsi ni rī jíin ró, achí.

Jeē ní jito ndee jexeén Jesús

(Mt. 4.1-11; Lc. 4.1-13)

¹² Yūcuán na te ni jinū Jesús nde nuū ñúhun téhé ní sáha Espíritu Santo.

¹³ Te uū xico quivī ni condee yā nuū ñúhun téhé un núu íin quití yúcú. Te ni jito ndee Satanás yā, chi cúní jeē sáha ya cuēchi. Te nuū ní cujiyo Satanás cuahān, te ni quecoo ndajéhé Yaā Dios, ni cajejníñu nuū yā.

Jeē ní quejéé Jesús nácani ya jnūhun

(Mt. 4.12-17; Lc. 4.14-15)

¹⁴ Yūcuán na te ná ni cachune de Juan vecāa, te ni jinū Jesús región Galilea, nácani ya jnūhun vāha ndese ndácu Yaā Dios jniñu.

¹⁵ Te ni cahān yā:

Je ni jinū quivī, te je ni cuyajni jeē ndácu Yaā Dios jniñu nuū rō. Nacani ni rō jeē stóo ró cuéchi ró jíjnáhan ró, te candíje ró jnúhun jeē jnáma ya rohó. Achí yá.

Jeē ní cana ya cuūn tēe jn# chācá

(Mt. 4.18-22; Lc. 5.1-11)

¹⁶ Te jica Jesús yumar Galilea cuahān yā. Te ni jito ya nuū Simón jíin ñani de Andrés. Te tēe cájni# chācá cácuu de, te cásinga de ñunu de ini mar.

¹⁷ Te ni cahān yā jíin de:

Condiquīn ruhū na quihín yō, te nasáha ri rohó tēe nihīn cuehē ñayuu candíje ruhū, nájnūhun cánihīn rō chācá, áchí yá.

¹⁸ Yūcuán na te ni castóo-ni de ñunu de, te ni candiquīn de ya.

¹⁹ Te ni jica ya jecu gā, te ni jito ya nuū Jacobo jíin ñani de Juan, sēhe Zebedeo, suni cáyücü de ini barco de, cánachijn# de ñunu de.

²⁰ Te suni ni cana ya de jeē cóndiquīn de ya. Te ni castóo-ni de tátá de Zebedeo ini barco un jíin mozo de, te ni candiquīn de ya cuango de.

Jeē ní quenehen ya tachī ini #n tēe

(Lc. 4.31-37)

²¹ Te ni jinū yā jíin de ñuu Capernaum. Te quivī ndétātu ní quivī ya ini vehe iī sinagoga, te ni steén yā jnúhun.

²² Te ni canaa ni ñayuu ni cajini i jnúhun stéén yā. Chi ni steén vāha ya nuū i, chí máá yá cúu jeē ndíso jniñu siquī ndihí. Te tēe cástéén tutu ley Yaā Dios, tu súcuan cástéén de.

²³ Te ini vehe iī sinagoga ñuu un íne #n tēe jeē ñúhun tachī ini. Te ni cana cóhó de:

24 ¿Naun vēji ní núū na jíjnáhan ná, Jesús ñuu Nazaret? ¿A vēji ní jéē snáa ni sáña, chí naún? Je jíni na ndé ñn cúu ní, chí Sēhe iī Yaā Dios cúu ní. Achí de.

25 Te Jesús ni cahān xeēn yā jíin táchī ún:

Casi yuhu ró te quenda ró ini de, áchí yá.

26 Te tachī ún xeēn ni jehni yíhí téē ún. Te ni cana cóhó, te ni quenda ini de cuahān.

27 Te ndíhi ñayuu ni cayūhú i, te cácajnūhun jnáhan i:

¿Na vé cúu jeē yáha? ¿A ñn jnūhun jéé cúu jeē yáha? Chí téē yáha cújéhnū de jeē ndácu de jniñu nde nuū tachī te quéndacoo, áchí i.

28 Te yachī ni jité núu jnūhun Jesús cuahān ní cáhnū región Galilea.

Jeē ní nasávāha ya naná chīsó Simón Pedro

(Mt. 8.14-15; Lc. 4.38-39)

29 Te ni quenda ya jíin de jíjnáhan de ini vehe iī sinagoga. Te Jesús ni jehēn yā jíin Jacobo jíin Juan nde vehe Simón jíin Andrés.

30 Te náná chīsó Simón, catú ña yíhi quíji ña. Te ni cacastūhún de nuū yā jeē cuhú ña.

31 Yūcuán na te ni quindehe ya nuū catú ña, te ni jni ya ndaha ña, te ni ndonehen ya ña. Te ni quenda-ni quíji ún ña, te ni sáha ña jeē ní cayeji de jíin yá.

Jeē ní nasávāha ya cuehē ñayuu

(Mt. 8.16-17; Lc. 4.40-41)

32 Te ni quēē niāndii te ni cuaa. Te ni quecoo ñayuu jíin táca ñáyuu cácuñū jíin jéē ñūhun tachī ini.

33 Te táca ñáyuu ñuu un ní cacutútú i yéhyí un.

34 Te ni nasávāha ya cuehē ñayuu cácuḥū tijnī nuū cuehyí, te ni quenehen ya cuehē tachī un cuángoo. Te tachī chí je cájini un yá, te tu ní jéhe ya jnūhun jeē cástūhun ndé ñn cúu ya.

*Jeē ní nacani ya jnūhun región Galilea
(Lc. 4.42-44)*

35 Te nehen ndasí ní ndonda ya, nde yínee gā. Te ni quenda ya cuahān sán ya yatā ñūū nuū tú ñayuu, te yūcuan ní jicān tahu yā.

36 Te Simón jín tēe cáhīn jín de, ni jenanducú de ya.

37 Te ni cananihīn de ya, te ni cacahān de jín yá: Tāca ñáyuu cánanducú i níhín, áchí de.

38 Te máá yá ni cahān yā:

Sa suhva na quíhín yō tāca gá ñuu íne yajni, návāha suni nacani ri jnūhun nuū i, chí jeē yūcuan ní quee rī. Achí yá.

39 Te súcuan te ni jica cuu ya ní región Galilea, ni nacani ya jnūhun ini vehe ñi sinagoga tācá ñuu, te ni quenehen ya tachī ini ñayuu.

*Jeē ní nasávāha ya ñn tēe ndóho cuehyī stehyú
(Mt. 8.1-4; Lc. 5.12-16)*

40 Te ñn tēe ndóho cuehyī stehyú, ni quee de ni jecuiñī yití de nuū yā, te ni cahān de jín yá:

Jíní na jeē cuu sáha ní jēe nduvāha ná, te núu cúní ni, áchí de.

41 Te Jesús ni cundáhú ni yā de, te ni soó yá ndaha ya siquī de, te ni cahān yā:

Cúní rī. Te na ndúvāha ró, áchí yá.

42 Te ná ni cahān yā súcuan, te ni nduvāha-ni tēe ndóho cuehyī stehyú un.

43 Yūcuán na te nátaǵí yá de quinhun de, te ni cahān nīhin ya jíin de:

44 Ma cáchi cuǵti rō nuū ní ñn. Chi quisteén rō maá ró nuū sutú, te condahá ró jeē socó rō nuū Yaā Dios siquī jeē ndúndoo ró núū yā, nájnūhun ni ndacu Moisés jniñu jenahán. Te súcuan te cuni ñayuu jeē ní nduvāha ró. Achí yá.

45 Te ni quenda de cuahān de, te ni quejéé de nácani de jnūhun nuū ndihi ñayuu ndese ni nduvāha de. Te siquī yúcuan tuá ni cúu quǵvi Jesús tācá ñuu, chi cúchitú ndasí ñáyuu nuū yā. Te ni jica ya yatā tācá ñuu nuū tu cúchitú ñáyuu. Te tāca lado ni quijicoo ñayuu nuū yā.

*Jeē ní nasávāha ya ñn tēe ndóho cuehyī ni íjin
(Mt. 9.1-8; Lc. 5.17-26)*

2

1 Te ni cuu jecu quǵvi, te ni quǵvi tucu Jesús ñuu Capernaum. Te ni cajini ñayuu jeē néne ya vehe.

2 Te ni cacutútú-ni cuehē ñayuu, te ni chitú vehe jeē ndé yehyí tuá núne. Te ni nacani ya jnūhun Yaā Dios nuū i.

3 Yūcuán na te ni quecoo cuñn tēe nuū yā, cándiso de ñn tēe ndóho cuehyī ni íjin.

4 Te tu ní cúu quǵvicoo de nuū yā siquī jeē chitú ñáyuu. Te ni cacoo de siquī véhe, te ni canune de ndaā nuū íin ya, te yaū un ní cascúun de tēe cúhú, cáttú de nuū ñn camilla.

5 Te ni jini Jesús jeē cácandíje de jeē cúu nasávāha ya tēe cúhú un. Te ni cahān yā jíin tēe cúhú un:

Séhē, je íne cáhnu ni rī nuū tāca cuéchi ró, áchí yá.

6 Te yúcuan cáyúcú jecu tēe cástéén tutu ley Yaā Dios, te tēe un ní cajeni ni de siquī yā:

⁷ ¿Naun cáhán tēe yáha súcuan? Cáhán de jnūhun ndevāha jeē quiṭi ní Yaā Dios, chi nasūu Yáā Dios cúu de jeē cóne cáhnu ni de nuū cuéchi.

⁸ Te ni jini Jesús jeē súcuan cájeni ni de, te ni cahān yā jín de:

¿Naun cájeni ni rō jeē cahán ndevāha ri?

⁹ Jeē uú jnūhun yáha, ¿ndé in yí gá cáa? ¿A jēē cahán rī jín téē cūhú: Je íne cáhnu ni rī nuū tāca cuéchi ró? ¿Chí yí gá jeē cahān rī: Ndocuiñi te naquihin ró camilla rō, te caca ró, achi rī?

¹⁰ Te vijna te na stéén rī jeē maá rí, Yaā ní nduu tēe, ndíso jniñu ri ini ñayivi yáha jēē cóne cáhnu ni rī nuū cuéchi.

Yūcuán na te ni cahān yā jín téē ni íjin ún:

¹¹ Cáhán rī jín ró, ndocuiñi te naquihin ró camilla rō, te quinhun rō vehe ró, áchí yá jín de.

¹² Yūcuán na te ni ndocuiñi-ni tēe ún, te ni naquihin de camilla de, te ni quenda de cuahān de, jito jínúu ndihi ñayuu. Te ndivii i ni canaa ni i cájito i, te ni cacahān i jeē yóhyo vāha Yaā cúu Yaā Dios. Te áchí i:

Ná tu coto cuiṭi yō ni in jniñu súcuan, áchí i.

Jeē ní cana ya Leví

(Mt. 9.9-13; Lc. 5.27-32)

¹³ Te ni quenda tucu ya cuahān yā nde yumar. Te tāca ñayuu ni jinūcoo i nuū yā, te ni steén yā jnūhun nuū i.

¹⁴ Yūcuán na te ni yāha ya cuahān yā, te ni jito ya nuū Leví sēhe Alfeo, néne de nuū cutútú xūhun renta. Te ni cahān yā jín de:

Condiquin ruhū na quihín yō.

Te ni ndocuiñi de, te cuahān de jín yá.

15 Yūcuán na te ni jehēn yā ni yeji yā staā vehe de. Te cuehē tē cástútú xúhun renta jiín inga tē cásáha cuēchi, suni cáyūcú de cáyeji de staā jiín Jesús jiín tē cáscuáha jiín yá, chi íyó cuéhē de jeē cándiquīn de ya.

16 Te tē cástéén tutu ley Yaā Dios jiín tē grupo fariseo, ni cajito de jeē yéji yā staā jiín ndihí tāca tēé ún. Te ni cacahān de jiín tē cáscuáha jiín yá:

¿Naun yéji maestro rō jiín tē cástútú xúhun renta jiín inga tē cásáha cuēchi? áchí de.

17 Te ni jini Jesús, te ni cahān yā jiín de:

Ñayuu cáhīyo váha, tu jini ñúhún i tē tájné, chi ñayuu cácuhū cúu jeē jini ñúhún. Te ruhū nasūu jēé véji ri cana ri ñayuu tú cuēchi, jeē cúu i nájñuhun ñayuu cáhīyo vāha. Chi sa suhva véji ri cana ri ñayuu cáhīyo cuēchi, jeē na nácani ni i te stóo i cuēchi i. Áchí yá.

*Jeē ní cacajnūhún de ya siquī jeē cóndite ni
(Mt. 9.14-17; Lc. 5.33-39)*

18 Te ni cuu iin quivī jeē cáhīyo ndite ni tē cáscuáha jiín Juan, jiín tē cáscuáha jiín grupo fariseo. Te ni quecoo jecu tēé, ni cacahān de jiín Jesús:

Tēé cáscuáha jiín Juan jiín jēé cascuáha jiín grupo fariseo, tijni jínu cáhīyo ndite ni de. Te tēé cáscuáha jiín máá ní, ¿naun tu cásáha de súcuan?

19 Te ni cahān Jesús jiín de:

¿A cuu condite ni de ní ní jēé iyó rí jiín de? ¿A cuu condite ni ñayuu cáhīn vico nándāha, te núu ní ní néne tēé nándāha? Chi núu néne tēé nándāha, te ma cúu condite ni i.

20 Te quee quivī jeē cújiyo tēe nándāha, te quivī ún chi condite ni i.

21 Te ni cahān yā uū jnūhun yátá síquī jeē tu quíjnāhan jnūhun jeé jéē steén yā jíin táca jnúhun jenahán. Achí yá:

Ni ñn tu náchuhun ñn pedazo sahma jéé núū ñn sahma túhú. Chi núu súcuan te ndiyi pedazo jeé un, te tahndē gā jeé tuhú un, te nducáhnú ga nuū cátáhdé un.

22 Te suni tu cáchuhun vino jeé ini ññi túhú. Chi núu súcuan te vino jeé un ndatá ññi ún, te naa vino jíin ññi. Jeē yúcuan cánuú jéé chúhun i vino jeé ini ññi jéé.

Jeē ní cataxín de yoco trigo quivī ndétātú

(Mt. 12.1-8; Lc. 6.1-5)

23 Te ñn quivī ndétātu ní yāha Jesús cuahān yā mēhñú nuū cáa trigo. Te tēe cáscuáha jíin yá, cájica de cuahān de, te ni quejéé de cátaxín de yoco trigo cáyeji de.

24 Yūcuán na te tēe grupo fariseo ni cacahān de jíin yá:

Condēhé. ¿Najehē casáha tēe cáscuáha jíin ró súcuan? Chi áchí ley Moisés jeē ma cúu sáha yó ni ñn jniñu quivī ndétātú. Achí de.

25 Te ni cahān maá yá jíin de:

¿A tu ní cácahu cuiñi rō tutu ndese ni sáha David, ñn quivī ní cumani jeē cáji de, te ni jíi de sōco jíin tēe cáhīn jíin de?

26 Te ni quivī de ini vehe Yaā Dios. Te Abiatar ni cuu sutū cujéhnú ga. Te ni yeji de pan iī jeē yosó ndijin nuū Yaā Dios. Te tú na ley jeē cáji ni ñn tēe, chi máa-ni sutū cuu caji. Te suni ni jēhe de ni cayejí

tēe cáhīn jíin de. Te tú na cuēchi ní íyo siquī de. Achí yá.

²⁷ Te suni ni cahān yā jíin de jíjnáhan de:

Tu ní jéconaā ñayuu jeē ndóho i nuū quiivī ndétātú, chí ni jeconaā quiivī un jéē ndétātú i.

²⁸ Núu súcuan te ruhū, Yaā ní nduu tēe, máá rí cúu jeē ndácu jniñu siquī ndese sáha ñayuu quiivī ndétātú, achí yá.

*Jeē ní nduvāha tēe ni ichī ndaha
(Mt. 12.9-14; Lc. 6.6-11)*

3

¹ Te ni quiivī tucu Jesús ini vehe iī sinagoga. Te yūcuan íne iin tēe ni ichī iin ndaha de.

² Te tēe grupo fariseo cájito yuhu de ya núu nasávāha ya tēe un quiivī ndétātú, návāha nihīn de cuēchi siquī yā.

³ Yūcuán na te ni cahān yā jíin tēe ni ichī ndaha ún:

Ndocuiñī te condichi rō mēhñu yáha, achí yá.

⁴ Te ni cajnūhun yá de jíjnáhan de:

¿Ndese cáhán ley siquī quiivī ndétātú? ¿A jéē sáha vāha yó, chí sáha néé yó? ¿A jéē nasávāha yó ñayuu je yajni cuu, chí sáha yó jéē cúu i? achí yá.

Te máá de tú na vé ni cacahān de.

⁵ Te ni quitī ni yā ni jito ya nuū de jíjnáhan de, te ni cucuíhyá ni yā jeē níhni ni de. Te ni cahān yā jíin tēe ni ichī ndaha:

Scáá ndaha ró.

Te ni scaá de, te ni nduvāha-ni ndaha de.

⁶ Yūcuán na te ni quendacoo tēe grupo fariseo, te ni casquíjnáhan de jnūhun jíin tēe grupo Herodes siquī yā, ndese cahni de ya.

Jeē ní quecoo cuehē ñayuu nuū yā yumar

⁷ Te Jesús cuahān yā nde yumar jíin tée cáscuáha jíin yá. Te cuehē ñayuu región Galilea ni candiquin i ya.

⁸ Te suni ñayuu región Judea, jíin ñayuu ñuu Jerusalén, jíin ñayuu Idumea, jíin ñayuu ichi núu cáne niāndii yūte Jordán, jíin ñayuu región Tiro jíin Sidón, cuehē ndasí ñayuu ni cajini jnūhun i jniñu jéhnú ni sáha ya, te ni quecoo i nuū yā.

⁹ Te ni cahān yā jíin tée cáscuáha jíin yá jeē na cóo tūhva in barco quiví ya, návāha ma chitú níhin ñayuu cuehē ún xiin ya.

¹⁰ Chi cuehē ñayuu je ni nasávāha ya, te jeē yúcuan vējicoo cuehē gā ñayuu cándoho tāca núu cuehyí, te chítú níhin i xiin ya jeē quehé i ya cácuni i.

¹¹ Te ñayuu cáñuhun tachī ini, núu ni cajito nuū yā, te cájecuñí yití núu yā, te cácana cóhó:

Máa ní cúu Sēhe Yaā Dios, achí.

¹² Te ni ndacu níhin ya nuū tachí un jéē ma cáhán gā jeē cúu ya Sēhe Yaā Dios.

*Jeē ní nacāji ya uxī uū tēe apóstol
(Mt. 10.1-4; Lc. 6.12-16)*

¹³ Yūcuán na te ni caa ya cuahān yā in yucu. Te ni cana ya tāca tée jeē cuní maá yá caca jíin yá, te ni quecoo de nuū yā.

¹⁴ Te ni jeni ya uxī uū de jeē cuñí de jíin yá, te taji yá de quingoo de nacani de jnūhun.

¹⁵ Te ni sáha ya jeē cóndiso jniñu de nasávāha de ñayuu cuhú te quenehen de tachī ini ñayuu.

¹⁶ Te yāha cúu ndihúxí uū tēe jeē ní nacāji ya: Simón jeē ní nasnání yá de Pedro.

17 Te Jacobo jíin ñani de Juan, sēhe Zebedeo. Te ni nasnání yá ndíndúú de Boanerges, jeē cuní cahān: Tēe yíhi fuerza nacani jnūhun, nájñūhun yíhi fuerza taja.

18 Te sava ga de nání de Andrés, Felipe, Bartolomé, Mateo, Tomás, Jacobo sēhe Alfeo, Tadeo, Simón tēe grupo cananista,

19 jíin Judas Iscariote, tēe jeē ní nastúu de ya.

Jeē ní cacahān ñayuu jeē jejniñu ya fuerza Satanás (Mt. 12.22-32; Lc. 11.14-23; 12.10)

Yūcuán na te ni quīvi ya ñin vehe jíin tēe cáscuáha jíin yá un.

20 Te ni ndutútú tucu cuehē ñayuu, te ni tuá ni cúu caji yā staā jíin de.

21 Te tāca jnáhan vehe ya ni cajini jnūhun jeē súcuan cúu. Te ni quecoo de venūquihin de ya. Chi cácahān de jeē ní sana xinī yā.

22 Te suni tēe cástéén tutu ley Yaā Dios jeē ní quijicoo nde ñuu Jerusalén, ni cacahān de:

Tēe yáha ñūhun Satanás ini de, jeē cujéhnū nuū tachí. Te jíin fuerza un quénehen de tachí, achí de.

23 Te ni cana ya de jíjnáhan de, te ni cahān yā ñin jnūhun yátá jíin de:

¿Ndese cuu quenehen Satanás máá?

24 Chi núu ñin nación sásñin máá te cuajnáhan máá, nación un má cúu ga coyūcu cáhnu.

25 Te núu ñayuu ñin vehe sásñin máá te cuajnáhan máá, ñayuu un má cúu ga coyūcu cáhnu.

26 Te suni súcuan Satanás jíin jnáhan tachí, chi núu sásñin máá te cuajnáhan máá, núu súcuan te ma cóo ga, chi sa suhva naa.

27 'Te ni ñn tēe ma cúu qūvi de ini vehe tēe ndacuī jeē quenehen de ndajñíñu de. Chi cánuú jeē xíhna gā cuhni de tēe ndacuī ún. Te suni súcuan cúu jeē jíhni rī Satanás te quénehen ri tachī.

28 'Te jendaá cahán rī jíin ró jeē iyó modo coo jñūhun cáhnu ni nuū tāca cuéchi cásáha ñayuu, te suni nuū tāca jñūhun néé cacahān i.

29 Te núu cahān ndevāha i síqūi Espíritu Santo, te ma cóne cáhnu ni Yaā Dios nuū i, chi sa suhva condee cuéchi síqūi i níí cáni, áchí yá.

30 Súcuan ni cahān yā, chi ni cacahān i jeē quénehen ya tachī jíin fuerza Satanás.

Náná yā jíin ñani yā

(Mt. 12.46-50; Lc. 8.19-21)

31 Yūcuán na te ni quee naná yā jíin táca ñani yā. Te íin ña nuū quéhe, te ni tají ña jñūhun cuahān nuū yā jeē cána ña ya.

32 Te ñayuu cáyūcu níí xiin ya, ni cacahān i jíin yá:

Náná ni jíin táca ñani ni cáhīin nuū quéhe, te cácuni cahān jíin ní, áchí i.

33 Te ni cahān maá yá:

¿Ndé ñn cúu náná rī jíin ñani rī? achí yá.

34 Yūcuán na te ni ndacoto ya nuū ñáyuu cáyūcú xiin ya ún, te ni cahān yā:

Suni náná rī jíin ñani rī cácuu tāca ñáyuu yáha.

35 Chi tāca ñáyuu casquícu jñíñu cúní Yaā Dios, suu cácuu ñani rī, cuāha ri, náná rī, achí yá.

Jñūhun yátá síqūi tēe jéte trigo

(Mt. 13.1-9; Lc. 8.4-8)

4

¹ Te yumar ni quejéé tucu Jesús steén yā jnūhun. Te ni cutútú cuéhē ndasí ñáyuu nuū yā, te jeē yúcuán ní quívi ya ni cucōo ya ini ñn barco nuū mar. Te tāca ñáyuu un cáyūcú i yumar.

² Te jíin jnūhun yátá ni steén yā cuehē jnūhun nuū i, te súcuán ni cahān yā:

³ Cuni nahín jíináhan ró: ñn tēe cate trigo, ni quenda de jeē cate de.

⁴ Te ná ni quejéé de jéte de, te jecu trigo ni jitē yuhíchi. Te ni quecoo saa, ni cayejí tī.

⁵ Te jecu gā trigo ni jitē nuū ñúhun yuū, nuū tú cuehē ñuhun. Te yachī-ni ni cane, chí tu cóquin ñuhun.

⁶ Te nuū ní cane niāndji, te ni ichī-ni, te ni casun, chí tu ní níhín nuū quihín yoho.

⁷ Te jecu gā trigo ni jitē nuū náne iñu. Te ni jehnu iñu ún, te ni jesi nuū, te tu ní jéhe nunī.

⁸ Te jecu ni jitē nuū ñúhun váha. Te ni cane, te ni jehnu, te ni jéhe cuehē nunī. Sava ni jéhe ocō uxí jeē ñn ñn nunī, te sava ga ni jéhe unī xico, te sava ga ni jéhe ciento. Achí yá.

⁹ Yūcuán na te ni cahān yā jíin de:

Tāca róhó jéé jíni sōho, na chúsóhó ró. Achí yá.

*Najehē cahán yā máni jnūhun yátá
(Mt. 13.10-17; Lc. 8.9-10)*

¹⁰ Yūcuán na te ni quendōo máa na yā, jíin ndihúxí uū tēe cáscuáha jíin yá, jíin jecu gā ñayuu cáhīin jíin de. Te ni cacajñūhún de ya na vé cuní cahān jnūhun yátá un.

¹¹ Te ni cahān yā jíin de:

Róhó, chi sáha Yaā Dios jeē cájecūhun ni rō jnūhun ni yisāhi yáha, ndese quívicoo ñayuu ndaha ya ndacu ya jniñu nuū i. Te ñayuu jeē cáhīn sīn siquī, chi máni jíin jnúhun yátá cáhán rī tāca jnúhun jíin i.

¹² Súcuan cáhán rī návāha vēsú cájito i, te quendōo i nájnūhun jeē tú na vé ni cájito i. Te vēsú cájini sōho i, te ma jécūhun ni i, te ma násāma ini i quívicoo i nuū rī, te ma cóo jnūhun cáhnu ni nuū cuéchi i, áchí yá.

*Jeē ní castūhun cájí yá jnūhun yátá téé jéte trigo
(Mt. 13.18-23; Lc. 8.11-15)*

¹³ Te ni cahān gā yā jíin de jíjnāhan de:

Núu tu cájecūhun ni rō jnūhun yátá yáha, ¿te ndese jecūhun ni rō tāca gá jnūhun yátá núu súcuan?

¹⁴ Tēe jéte trigo cúu tēe scuíté núu jnūhun Yaā Dios.

¹⁵ Te trigo jeē ni jítē yuhíchi cúu nájnūhun ánuá sava ñayuu. Chi cájini nahín i jnūhun ya, te ná ni cajini i, te quíji-ni Satanás te quénde-ni jnūhun ini anuá i.

¹⁶ Te trigo jeē ni jítē nuū ñúhun yuū, chi cúu nájnūhun ánuá sava ñayuu cájini nahín jnúhun, te yachī-ni cájetáhú i te cácusī ni i jíin.

¹⁷ Te tu cúcutú jnúhun ún ini anuá i, te jecu-ni quíivī cájetáhú i. Te núu ni quejéé jnúndóho, chí jító xeēn ñayuu i siquī jnúhun ún, te quejéé nácani yátá ni i.

¹⁸ Te jeē ni jítē nuū náne iñu cúu nájnūhun jecu gā ñayuu. Chi vēsú ni cajini sōho i,

¹⁹ te cándihvī ni i siquī jeē iyó ini ñayíivī yáha. Te cácuni i cucúcá i, te stáhú un i jeē cutóó ni i siquī

tācá ndajníñu. Te ndíhi jeē yáha cácujnéñu i jíin, te jési nuū jnúhun ya, te tu íje i jíin jnúhun ya.

²⁰ Te trigo jeē ni jítē nuū ñúhun váha cúu nájnūhun ñayuu cájini nahín jnúhun, te cájetáhú i, te cáhije i jíin jnúhun ya. Te sava i cúu nájnūhun nunī jeē jéhe ocō uxī jeē ñn ñn, te sava i jéhe unī xico, te sava ga i jéhe ciento. Achí yá.

Jnúhun yátá síquī lámpara

(Lc. 8.16-18)

²¹ Suni ni cahān yā jíin de:

Núu nástñn ñayuu ñn lámpara, ¿a chúne i chíji ñn cajón chí chíji jīto? Tuú, chí jéni i nuū sucún návāha cundijin.

²² Te suni súcuan, tu íyó ni ñn jnúhun sāhi jéē ma cúni ñayuu, chí ndíhi tāca jnúhun natūu ndijin te cuni ñayuu.

²³ Tāca rōhó jéē jíni sōho, na chúsóhó ró, áchí yá.

²⁴ Te suni ni cahān yā jíin i:

Cuni sōho vāha ró. Chí cūhva jeē chusóhó ró jnúhun Yaā Dios, suni cūhva un cuáha ya nuū rō, te víhyá gā cuāha ya nuū maá ró jeē chusóhó váha ró.

²⁵ Chí ñayuu je jécūhun ni, stéén gā yā nuū i. Te ñayuu tu cándije, máá jecu jeē jiní i ún, sa suhva naa. Achí yá.

Jnúhun yátá síquī trigo jeē jéñu

²⁶ Te ni cahān gā yā:

Súcuan cúu jeē ndácu Yaā Dios jniñu nuū ñáyuu: Cúu nájnūhun trigo jeē ní jete ñn tēe.

²⁷ Yūcuán na te quíxí de te ndónnda de, te súcuan jíca quivī cuahān. Te trigo un cáne te jéñu. Te máá de tu jíní de ndese cúu jeē jéñu.

28 Chi máá ñuhun sáha jeē jéhnú trigo, xīhna gā yucū, sáá te cáne yoco, yūcuán na te íje máá núni.

29 Te núu ni cuaan trigo un, te quéjéé ñáyuu cájehnde i, chi je ni jinū quiṽi tahndé. Achí yá.

*Jnūhun yátá síquī ndiquin mostaza
(Mt. 13.31-32; Lc. 13.18-19)*

30 Te suni ni cahān yā:

Na cáhán rī ñn jnūhun yátá návāha cuni rō ndese ndúcuehē ñayuu jeē ndácu Yaā Dios jniñu nuū.

31 Ndúcuehē i nájñuhun jéhnú ñn ndiquin mostaza jeē jéquin i nuū ñúhun. Te yūcuan cúu ñn ndiquin lúlí gá vēsú tācá ndiquin jeē iyó.

32 Te ná ni jequin i, te cáne te jéhnú ga vēsú tāca gá yucū, te cúnáhnú ndaha. Te tācá saa chi sáha ti tacā tī nuū cuándahū xinī ún. Achí yá.

*Jeē máni jnūhun yátá cáhán yā jíin i
(Mt. 13.34-35)*

33 Te cuehē jnūhun yátá súcuan ni cahān yā jíin ñáyuu, núu nasaa cánda i jecūhun ni i.

34 Te tāca jéé ni stéén yā, máni máá jnúhun yátá ní cahān yā jíin i. Te nuū tēe cáscuáha jíin yá chi ni nacastūhun cájí yá jnūhun ún.

*Jeē ní jecuiñi tachī ñhin jíin mar ni sáha ya
(Mt. 8.23-27; Lc. 8.22-25)*

35 Te jeē cuácuaa quiṽi ún, te ni cahān yā jíin tēe cáscuáha jíin yá:

Na yáha yó quiñin yō inga lado mar, achí yá.

36 Te ni casquéndōo de ñayuu cuehē ún, te ni quiṽicoo de ini barco nuū je íne Jesús, cuangoo de jíin yá. Te suni cuangoo jecu gā barco jíin de jíinánhan de.

³⁷ Te ni jequĩhi ñn tachĩ níhin, te ni stónnda ndute mar, te ni quĩvi ini barco. Te je yajni chitú ndute ini barco.

³⁸ Te Jesús cá tú yá yatā de ini barco, quixí yā te yĩhi ñn sahma cástíhi xinĩ yā. Te ni castónnda de ya, te ni cacahān de:

Maestro, ¿á tu sáha ní cuenta jeē quēe yó chíji ndute te cuu yō? achí de.

³⁹ Te ni ndocuiñĩ yā, te ni cahān yā nuū tachĩ níhin un jíin núū mar:

Jecuiñĩ te nayúú-ni coo ró, áchí yá.

Te ni jecuiñĩ tachĩ, te ni cuu nayúú lí-ni.

⁴⁰ Te ni cahān yā jíin de jíjnáhan de:

¿Naun cáyūhú ndasí ró? ¿Naun tu cá candíje ró jeē cácu ró sáha rí?

⁴¹ Te yōhyo ni cayūhú de, te ni cacahān de jíin jnáhan de:

¿Ndé ñn ga cúu tēe yáha jeē nde tachĩ níhin jíin mar cájetáhú jeē cahán de? áchí de.

*Tēe Gadara jeē ndóho tachĩ
(Mt. 8.28-34; Lc. 8.26-39)*

5

¹ Te ni jinū Jesús jíin de jíjnáhan de ñnga lado mar, región Gadara.

² Te ná ni quenda ya ini barco un, te ñn tēe ñúhun tachĩ ini, ni quenda de nde nuū yíndūji ndĩyĩ, te ni quee de nuū yā.

³ Tēe un ndéé de nuū yíndūji ndĩyĩ. Te tu jéjníñu jeē jíhni ñayuu de, ni jíin cadena.

⁴ Chi cuehē jínu ni conuhnĩ jehē de ndaha de jíin cadena. Te tāca jínu jéhnde de, te sácuéché de. Te tú ni ñn cúndeyí jíin de.

⁵ Te nduú ñuú jíca de yucu jíin núū yíndūji ndīyi, te cána cóhó de, te stújí de máá de jíin yúū.

⁶ Te náa jíca gá vēji Jesús, te ni jito de ya. Te jínu de ni quee de nuū yā, te ni jecuñī yití de nuū yā.

⁷ Te ni cana cóhó de:

¿Naun vēji ní núū ná, Jesús Sēhe Yaā Dios, Yaā cujéhu téyí? Cáhán ndahú ná jíin ní, jíni nahín Yaā Dios, ma stóho ní sáña, áchí de.

⁸ Súcuan ni cahān de, chi je ni cahān Jesús:

Táchī, quenda ini tēe yáha quíhīn rō.

⁹ Te ni cajnūhun yá de:

¿Na vé naní ró?

Te ni cahān de:

Legión naní ná, chi cuehē tachī ñūhun ini ná, áchí de.

¹⁰ Te ni cahān ndahú ndasí de jíin yá jeē ma tájí yá tachī quendacoo región ún.

¹¹ Te yajni yucu yúcuan cáhīn cuehē quíñī cájitu tī.

¹² Te tachī jeē ñūhun ini tēe un ní cacahān ndahú jíin yá:

Núu tají ní sáñá, te cuāha ní jnúhun quíñīcoo ná ini quíñī yūcuán, áchí.

¹³ Te Jesús ni jēhe ya jnūhun. Te ni quendacoo tachī ún ini tēe ún, te ni quíñīcoo ini quíñī, te íyó nájñūhun uū mil tī. Te quíñī un ní cajinu tī ni ñingoo tī ñn yucáva, ni quíñīcoo tī nuū mar. Te ni ndaquíhi tī ndute, ni cajihī tī.

¹⁴ Te tēe cándito tī, ni cajinu de cuangoo de jeē ní cayūhú de. Te ni jinūcoo de ni cacastūhún de nuū ñáyuu ñuu un jíin ñáyuu tāca rancho. Te cuangoo ñáyuu un cuácondēhé i na vé ni cuu.

15 Te ni jinūcoo i nuū íne Jesús, te ni cajito i nuū tée ni ñuhun cuehē tachī ini. Te néne de, te ñúhun de sahma, te je ni nducájí xínī de. Te ni cayūhú ñáyuu ún.

16 Te tēe ní cajito, ni canacani de jnūhun nuū ñáyuu, ndese ni nduvāha tēe ni ñuhun tachī ini, jíin ndese ni candoho quínī ún.

17 Yūcuán na te ni caquejéé i cácahān ndahú i jíin yá jeē na cújiyo ya región yūcuan quíhīn yā.

18 Te ni ndīvi ya ini barco. Te tēe ni ñuhun tachī ini un ní cahān ndahú de jíin yá jeē na cuáha ya jnūhun quíhīn de jíin yá.

19 Te Jesús tu ní jéhe ya jnūhun, chi ni cahān yā jíin de:

Cuánuhun vehe ró núū jnáhan ró, te nacani ró jnúhun nuū i ndese yōhyo jéhnū jniñu ni sáha máá Jítóho rō jíin ró, te ndese ni cundáhú ni yā rohó, áchí yá.

20 Te ni quenda de cuahān de, te ni quejéé de nácani de jnūhun tācá ñuu Decápolis ndese yōhyo jéhnū jniñu ni sáha Jesús jíin de. Te ndīvii ñayuu un ní canaa ni i cájini nahín i.

Jnūhun sēhe síhí Jairo jíin ñahan ní quehé yusáhma ya

(Mt. 9.18-26; Lc. 8.40-56)

21 Te ni nayāha tucu Jesús cuanuhun yā inga lado mar jíin barco. Te ni quecoo cuehē ñáyuu nuū yā, nuū íne ya yumar.

22 Te ni quee in tēe cújéhnū ini vehe īī sinagoga, naní de Jairo. Te ná ni jito de nuū yā, te ni jecuíñī yití de nuū jehé yā.

23 Te ni cahān ndahú ndasí de jíin yá:

Sēhe síhí ná je yajni cuu i. Na quíhín yō vehe ná te soó ní ndaha ní síquī i návāha na ndúvāha i te cotecu i, áchí de.

²⁴ Yūcuán na te cuahān yā jíin de. Te cuehē ñayuu cándiquīn i ya, te ni chitú níhin i xiin ya cuangoo i.

²⁵ Te mēhñu ñáyuu un cuáhān ñn ñahan cúhú, jeē ní cuu uxī uū cuiyā ndóho ña cuehyī niñī.

²⁶ Te yōhyo ni ndoho ña, chi ni jexin ña tāca jēē névāha ña jíin cuehē tēe tájné, te tu ní jéjníñu jeē ndúvāha ña, chi sa suhva víhyá gā sáha.

²⁷ Te ñahan yáha ná ni nihīn ña jnūhun Jesús, te ni quee ña ichi yátá yā mēhñu ñáyuu cuehē ún, te ni quehé ña yusáhma ya.

²⁸ Chi ni jeni ni ña: Vēsú maá sahma ya na níhín rī quehé rí, te nduvāha rī, jéni ni ña.

²⁹ Te ni jecuiñī-ni niñī ña, te ni jini ña jeē ní nduvāha ña cuehyī ún.

³⁰ Te Jesús ni jini yā jeē ní nduvāha ñn ñayuu jíin fuerza yā. Te ni ndió cóto ya nuū ñáyuu cuehē, te ni cahān yā:

¿Ndé ñn ni quehé sahma rī? Achí yá.

³¹ Te tēe cáscuáha jíin yá, ni cacahān de:

Jító ní jēē ñáyuu cuehē yāha ní chitú níhin i xiin ní te cáquīhi i níhín ní cáni ichi, te cájnūhun ní ndé ñn ni quehé sahma ní.

³² Te máá yá jító ya cháha chúcuan, cúní yā jeē na cáchi ñayuu ni sáha.

³³ Te ñahan un yúhú ña te quísí i ña, te je jíní ña jeē ní nduvāha ña. Te ni quee ña, te ni jecuiñī yití ña nuū yā, te ni cachi ña ndíhi ndese ni cuu jíin ña.

³⁴ Te ni cahān yā jíin ña:

Séhē, ni candíje ró jéē cuu nasávāha ri rohó, te jeē yúcuau ní nduvāha ró. Cuáhán te na ndúsī ni rō, chi je ni nduvāha ró cuéhyī ní ndoho ró, áchí yá.

³⁵ Te níni cáhán gā yā súcuau, te ni quecoo ñayuu cáyūcú vehe tēe cújéhnu ini vehe īi sinagoga, te ni cacahān i jíin de:

Je ni jihī sēhe síhí ní. Te ma sajnēñu ga ní Maestro, achí i.

³⁶ Te Jesús tu ní sáha ya cuenta jeē súcuau cácahān i, te ni cahān yā jíin tēe cújéhnu ini vehe īi sinagoga:

Ma yūhu ró, chi candíje ró jéē nastécu rī i, áchí yá.

³⁷ Te tu ní jéhe ga yā jnūhun condiquīn ñayuu yā, chi máa-ni Pedro jíin Jacobo, jíin Juan ñani Jacobo.

³⁸ Te ni jinū yā vehe tēe cújéhnu ini vehe īi sinagoga, te ni jito ya ñayuu, cácuvaā i, te cándahyū i, te cácana cóhó i.

³⁹ Te ni quīvi ya, te ni cahān yā:

¿Najehē yōhyo cásavaā rō te cándahyū rō? Sūchi síhí yáha, tu ní jíhí i, chí quíxí-ni i, áchí yá.

⁴⁰ Te ni cajecū catá i jeē ni cáhān yā. Te ni quenehen ndihí ya i cuahān i nuū quéhe. Te ni cana ya máa-ni tátá jíin náná sūchi síhí un, jíin tēe cáhīin jíin yá, te ni quīvi ya jíin de nuū catú súchi síhí ní jihī ún.

⁴¹ Te ni jnī ya ndaha i, te ni cahān yā jíin i:

Talita cumi, achí yá. Te jnūhun un cúní cahān: Síhī, cáhán rī jíin ró, ndocuñī, achí yá.

⁴² Te ni ndocuñī-ni sūchi síhí un, te ni nacaca i, chí je íyó i uxī uū cuiyā. Te yōhyo ni canaa ni ñayuu cájito i.

⁴³ Te ni ndacu nīhin ya jniñu nuū i jíjnáhan i jeē ma cáchi cuiti i nuū ní ñn. Te ni cahān yā jeē na cuáha ña jeē cáji sūchi síhí.

*Jeē cuánuhun yā ñuu Nazaret
(Mt. 13.53-58; Lc. 4.16-30)*

6

¹ Te ni quenda Jesús yūcuán, te cuanuhun yā ñuu yā. Te tēe cáscuáha jíin yá cuango de jíin yá.

² Te máá quívī ndétātu ní steén yā jnūhun ini vehe iī sinagoga. Te cuehē ñayuu ni canaa ni i cájini nahín i, te ni cacahān i:

¿Ndé nuū ní cutūhva tēe yáha tāca jnúhun yáha?
¿Te ndese cúu jeē cahán de jnūhun ndíchí yáha jíin jéē sáha de jniñu jéhu yáha?

³ Chi tēe yáha cúu carpintero, te sēhe María cúu de, te ñani Jacobo jíin José jíin Judas jíin Simón cúu de. Te suni cáyūcu cuáha de jíin yó yāhá. Achí i.

Te súcuan ni cacujéē ni i nuū Jesús.

⁴ Te ni cahān yā jíin i:

Tāca tēe nácani jnūhun Yaā Dios, íyó yíñúhún ñayuu jíin de, chi máni ñayuu ñuu maá de, jíin jnáhan de, jíin ñayuu vehe de cúu jeē tu íyó yíñúhún jíin de. Achí yá.

⁵ Te tu ní cúu sáha ya cuehē jniñu jéhu yūcuán. Chi jecu-ni ñayuu cácuñu ni soó yá ndaha ya siquī i, te ni nasávāha ya i.

⁶ Te náā ni yā jíto ya jeē tu cácuñe ñayuu jijnáhan i. Yūcuán na te ni jica cuu ya tācá ñuu yajni, ni steén yā jnūhun.

*Jeē ní tají yá ndihúxí uū de cuanacani de jnūhun
(Mt. 10.5-15; Lc. 9.1-6)*

⁷ Te ni cana ya ndihúxí uū tēe cáscuáha jíin yá, te ni tají yá ndihuū ndihuū de quingoo de. Te ni sáha ya jeē cóndiso jniñu de quenehen de tachí ini ñayuu.

⁸ Te ni ndacu ya jeē tú na vé condiso de jeē cuajníñu de ichi, ni ñunu, ni staā, ni xūhún. Chi máá vara-ni condahá de.

⁹ Te quihí de ndijēn, te ma quihín de jíin úu sahma, áchí yá.

¹⁰ Te suni ni cahān yā jíin de:

Na-ni vehe núu ni quivícoo ró, te yūcuán coyūcu ró ndé quenda tucu ró quihín rō inga ñuu.

¹¹ Te núu ñin ñuu tu cájetáhú i róhó, ni tu cúní i cuni nahín i jnūhun cahān rō, na quéndacoo ró yúcuán, te scóyo ró tícachā jehē rō, te súcuán stéén rō jeē iyó cuéchi i jeē tu ní cájetáhú i. Jendaá cahán rī jíin ró jeē quiví coo juicio te xeēn gā coo castigo siquī ñuu casáha súcuán vēsú siquī ñuu Sodoma jíin ñuu Gomorra nuū ní casáha ndasí ñáyuu cuéchi.

¹² Te ni quendacoo de cuahān de, te ni canacani de jnūhun jeē na nácani ni ñayuu jeē stóo i cuéchi i.

¹³ Te suni ni caquenehen de cuehē tachī ini ñayuu. Te ni cachihí de aceite cuehē ñayuu cácuahū, te ni canduvāha i.

Jeē ni jíihí Juan tēe scuándute

(Mt. 14.1-12; Lc. 9.7-9)

¹⁴ Te rey Herodes ni jini jnūhun de jnūhun Jesús, chí ni jitē núu jnūhun ya ní cáhnu. Te ni cahān de:

Tēe yúcuán cúu Juan tēe ni scuándute, te ni natecu de. Jeē yúcuán iyó poder de sáha de jniñu jéhnu. Achí de.

¹⁵ Te sava ga ñayuu ni cacahān i:

Tēe un cúu Elías jeē ní nacani jnūhun jenahán.

Te sava ga i ni cacahān:

Tuú chí ñin tēe nácani jnūhun Yaā Dios cúu de, nájnūhun tēe ni canacani jnūhun ya nde jenahán, áchí i.

16 Te ná ni jini Herodes, te ni cahān de:

Tuú chi yūcuan cúu Juan jeē ní ndacu ri jniñu ni tahndē xinī, te ni natecu de núu súcuan, áchí de.

17 Chi máá Herodes ni ndacu de jniñu jeē na quívi Juan vecāa, jíin jéē na cónuhni de jíin cadena. Súcuan ni sáha de jeē siquí Herodías, ñasihí ñani de Felipe. Chi Herodes ni quihin de ña jeē cúu tucu ña ñasihí de.

18 Te Juan ni cahān de nuū Herodes:

Tu íyó ley jeē cóndeca ró ñasihí ñani rō, achí de.

19 Te jeē yūcuan Herodías ni jito uhū ña Juan, te cúní ña jeē na cúu de, te tu ní níhín ña modo.

20 Chi Herodes yúhú de cahni de Juan, chi jíin de jeē tēe ndaā tēe ndoo cúu Juan. Te jeē yūcuan ní jesi de jeē nducú ña jeē cúu Juan. Te nújnahan ni de jíin nahín de jñuhun cáhán Juan, vēsú tu jécūhun vāha ni de.

21 Te ni quee ñn quívi jeē ní cundeyí Herodías. Chi ni sáha Herodes ñn vico quívi ní cacu de, te ni jēhe de jeē ní cacuxíni tēe cándiso jniñu nuū de, jíin tēe cácuu capitán, jíin tēe cácujuhnu región Galilea.

22 Te ni quívi sēhe síhí máá Herodías, ni jita jéhé i nuū chitú un. Te ni cacusiñ ni rey Herodes jíin tēe cacuxíni jíin de. Te ni cahān de jíin súchi síhí un:

Cacān na vé cuní rō, te cuāha ri nuū rō, achí de.

23 Te ni cahān teyí de jeē cuāha de núu na vé cuní i cacān i, vēsú nde sava región jeē yíhi ndaha de.

24 Te ni quenda i, ni jecajñuhún i náná i:

¿Na vé cacān na núu de? áchí i.

Te ni cahān ña:

Xinī Juan tēe scuándute cacān rō nuū de, áchí ña.

25 Yūcuán na te ni ndívi-ni i nuū rey, te ni cahān i:

Cúni na jēē vijna ñúhún-ni cuāha ní xínī Juan tēe scuándute, cone nuū ñn cohō, achí i jíin de.

²⁶ Yūcuán na te ni cucuíhyá ndasí ni rey un jeē ní cundeyí Herodías jeē cúū Juan. Te siquī jeē ni jéjnūhun téyí de, jíin jēē ní cajini sōho tēe cáyeji staā jíin de, jeē yúcuan tu ní cúni de sásáhán de jeē ni jíicān i.

²⁷ Te ni tají-ni de ñn soldado jeē quíquīhin de xinī Juan.

²⁸ Te ni jehēn soldado un vecāa, te ni jehnde de xinī Juan. Te ni quee de jíin xínī Juan, íne nuū ñn cohō. Te ni jēhe de nuū sūchi síhí un, te máá i ni jēhe i nuū naná i.

²⁹ Te tēe cáscuáha jíin Juan ni canihīn de jnūhun, te ni jengoo de, ni candonehen de yiqui cúñu Juan, te ni cachindūji de.

Jeē ni scáji yā uhūn mil tēe

(Mt. 14.13-21; Lc. 9.10-17; Jn. 6.1-14)

³⁰ Yūcuán na te tēe cácuu apóstol jeē ní tají yá cuangoo nacani jnūhun, ni ndecoo de nuū Jesús. Te ni canacani de nuū yā tācá jniñu ni casáha de, jíin jnúhun ni castéén de.

³¹ Te ni cahān yā jíin de:

Na quíngoo yó ñn lugar nuū tú ñayuu, te ndetātu yó jecu, achí yá.

Chi cuehē ñayuu cuahān i vēji i nuū yā, te ni tu ní núne ya jeē cáji yā staā jíin de.

³² Yūcuán na te ni quívi ya ñn barco jíin táca tēe apóstol un, te cuangoo síin ya jíin de ñn lugar nuū tú ñayuu.

³³ Te cuehē ñayuu ni cajito i jeē cuahán yā jíin de, te ni canacuni i jeē maá yá cúu. Te nde tācá ñuu

ni quendacoo i, te yachī cuangoo i, te xīhna gā i ni jinūcoo vēsú maá yá.

³⁴ Te nuū ní quenda Jesús ini barco, te ni jito ya ñayuu cuehē ún. Te ni cundáhú ni yā i, chí cúu i nájñūhun lanchi jeē tú jitoho tī. Te ni steén yā cuehē jñūhun nuū i.

³⁵ Te nuū ní ini, te tēe cáscuáha jíin yá, ni quecoo de nuū yā, te ni cacahān de:

Je ni ini, te yāhá chí tú na ñayuu yúcu.

³⁶ Núu súcuan te tají ní ñayuu na quíngoo i tāca rancho jíin ñuu yajni, te cuaan i staā caji i, chí tú na vé cándiso i caji i, áchí de.

³⁷ Te ni cahān Jesús jíin de:

Cuāha máá ró jeē cáji i, áchí yá.

Te ni cacahān de:

¿Te ndese cuu? Chí ni ma cúu vēsú núu quicuaan ná ndé uū ciento denario staā caji ñayuu, achí de.

³⁸ Te ni cahān yā jíin de:

¿Nasaa staā cánevāha ró? Cuacondēhe, áchí yá.

Te nuū ní cajini de, te ni cacahān de:

Uhūn-ni staā jíin úu chācá íyó, áchí de.

³⁹ Yūcuán na te ni cahān yā jíin ñáyuu jeē na cúcōo sín i cuenta grupo nuū íte.

⁴⁰ Te ni cacucōo sín ciento ciento i, jíin cincuenta cincuenta i.

⁴¹ Te ni quihin ya ndihúhún staā jíin úu chācá un, te ni ndacoto ya ichi ándiví, te ni nacuatáhú yá. Te ni tahu cuéchí yá staā ún, te ni jēhe ya nuū tēe cáscuáha jíin yá, te máá de ni casaja de nuū ñáyuu cuehē ún. Te suni ni jēhe ya ndindúú chācá, ni casaja de nuū i.

⁴² Te ndivii i ni cayeji, te ni candutú chíji i.

43 Yūcuán na te ni canastútú de pedazo staā jín cháca jēē ní quendōo, te ni chitú úxī uū jīca.

44 Te tēe ni cayeji, chi uhūn mil de cúu.

*Jeē ní jica jéhé yá nuū mar
(Mt. 14.22-27; Jn. 6.16-21)*

45 Yūcuán na te ni cahān-ni Jesús jín tēe cáscuáha jín yá jeē na quívicoo de barco, te cosnūú de yāha de inga lado mar ñuu Betsaida. Te máá yá chi natajǎ yá ñayuu quinuhun i, te sáá te suni quihīn yā.

46 Te nuū ní cuu ni natajǎ yá i, te ni caa ya yucu cuacacān tahú yā.

47 Te jeē ní cuaa, te barco un je ni cuu sava nuū mar cuahān, te máñúhún-ni ya ni quendōo nuū ñúhun íchi.

48 Te ni jito ya jeē yóhyo jnūndóho cáscáca de barco, chi nīhin vēji tachī ichi núú de. Te jeē yínee gā ni quee ya nuū de, jíca jéhé yá nuū mar. Te yāha ya nuū de quihīn yā nuú.

49 Te ni cajito de jeē jíca ya nuū mar, te ni cajeni ni de jeē jihná cúu, te ni cacana cóhó de.

50 Chi ndihí de ni cajito nuū yā, te ni cayūhú ndasí de. Te ni cahān-ni ya jín de:

Ndeyí coo ni rō, te ma yūhu ró, chi máá rí cúu, áchí yá.

51 Te ni quívi ya ini barco un, te ni jecuiñī-ni tachī. Te yóhyo ní canaa ni de cájito de.

52 Chi cándāa néé gá jeē níjnūní de, chi ni jín jniñu jéhnū jeē ní nducuehē staā, tu ní cájecūhun ni de jeē máá yá cúu Yaā ní tajǎ Yaā Dios.

*Jeē ní nasávāha ya ñayuu cácuñū región Genesaret
(Mt. 14.34-36)*

⁵³ Te ni quenda jíyo ya jíin de nuū mar ún, ní jinū yā región Genesaret. Te yundúte un ní cajihni de barco.

⁵⁴ Te nuū ní quenda ya jíin de ini barco, te ñayuu yúcuán ni canacuni-ni i ya.

⁵⁵ Te yachī ni jengoo i tãcá ndañūū yūcuán, te ni caquindeca i ñayuu cácuñū, cáyosó i nuū camilla, vējicoo ñayuu nuū ní jito i íne ya.

⁵⁶ Te ndé-ni cúu-ni núu ni quívi ya, núu ñuu lulí, chí ñuu cáhnu, chí rancho, te cájequin i ñayuu cácuñū yuhíchi, te cácahān ndahú i jíin yá jeē na quéhé i vēsú yusáhma ya. Te tãca ñáyuu jeē ní caquehé sahma ya, ni canduvāha-ni i.

*Siquī ndese cújnehén ñayuu
(Mt. 15.1-20)*

7

¹ Yūcuán na te tē grupo fariseo jíin jecu tē cástéén tutu ley Yaā Dios, ni quendacoo de ñuu Jerusalén, te ni quecoco de nuū Jesús.

² Te tē un ní cajito de jeē sava tē cáscuáha jíin Jesús, ni cayejí jnehén de staā, chí tu ní cáscuicu de costumbre jeē nándahá de nuū Yaā Dios. Te ni cacahān siquī de.

³ Chí tē fariseo jíin ndíhi ñayuu hebreo, névāha i costumbre jenahán jeē ma cáji i staā núu tu nandahá váha i xihna gā.

⁴ Te núu ni ndecoo i jeē ni jengoo i nuū yáhu, te tu cáyeji i te núu tu nandahá i. Te íyó cuéhē gā costumbre jenahán jeē casquicu i, nájnūhun jeē ndúndoo taza, tindohō, cohō cáa, jíin jíto.

⁵ Te tē fariseo jíin tē cástéén tutu ley Yaā Dios, ni cacajnūhún de ya:

Tēe cásquáha jíin ró, ¿naun tu cásquícu de costum-bre ñayuu jenahán? Chi sa cáyeji jnehén de staā, achí de.

⁶Te ni cahān yā jíin de:

Ndaā ni nacani Isaías jnūhun siquī rō jijnáhan ró jéē tēe stáhú-ni cácuu ró. Chi súcuan ni tee de jnūhun ni cahān Yaā Dios nde jenahán:

Ñayuu yáha chi máá yuhu-ni i cájetáhú i ruhū, te nasūu ndé jíin ini jíin ánuá i.

⁷Te cáchiñúhún sáá-ni i ruhū, chí jnūhun cástéén i cúu jniñu ní candacu tēe, te nasūu jéē ní ndacu máá rí cúu.

Achí Yaā Dios. Achí Isaías.

⁸Súcuan cácuu ró, chí ni casiáá rō jniñu ní ndacu Yaā Dios nuū rō, te cásquícu ró costumbre jeē ní cajequin ñayuu, jeē ndúndoo tindohō jíin taza. Te cuehē gā costumbre súcuan cásquícu ró, áchí yá.

⁹Te suni ni cahān yā:

Casiáá rō jniñu ní ndacu Yaā Dios, návāha squícu ró costumbre ni cajequin máá ró.

¹⁰Chi Moisés ni cahān de: Coó yíñúhún ró jíin tátá rō jíin náná rō. Te núu ndé ñn cahān siquī tátá chí siquī naná, na cúu nahín. Achí Moisés.

¹¹Te máá ró chí cácahān rō jeē cuu cahān ñn tēe jíin tátá de náná de: Ma cúu chindéé ñáhán ná níhín cuáha na jéē cáji ni jéē cúhun ní, chí ndihí jeē névāha ná, chí Corbán cúu, áchí ró. (Te jnūhun Corbán cuní cahān jeē ni sócō nuū Yaā Dios.)

¹²Te cácahān rō jeē núu súcuan cahān ñn tēe, te tuá cánuú chindéé ñáhán de tátá de náná de.

¹³Te súcuan cástívi ró jniñu ní ndacu Yaā Dios, jeē siquí costumbre ni cajequin ñayuu jenahán vēji. Te cuehē gā jniñu súcuan cásáha ró, áchí yá.

14 Te ni cana tucu ya ñayuu cuehē ún, te ni cahān yā jiín i:

Cuni sōho vāha ró jíjnáhan ró, te chuhun ni rō:

15 Tāca jēē iyó, te núu ni quívi yuhu ñayuu te tu cújnehén i sáha. Chi jeē quénda ini anuá ñayuu, yūcuan cúu jeē kujnehén i sáha.

16 Tāca róhó jēē jíni sōho, na chúsóhó ró, áchí yá.

17 Te ni stóo ya ñayuu cuehē ún, te ni quívi ya ini vehe. Te tēe cáscuáha ún, ni cacajnuhún de ya síquī jnúhun yátá yáha jēē ni cáhān yā.

18 Te ni cahān yā jiín de:

¿A máá ró suni ná tu jecūhun ni rō, chí naún?
¿A tu cájini rō jeē tāca jēē quívi ini ñayuu, ma cúu kujnehén i sáha?

19 Chi tu quívi ini anuá i, chi chíji i quívi, te quénda-ni cuahān, achí yá.

Súcuan ni steén yā jeē tāca jēē yéji ñayuu, tu cújnehén ánuá i sáha.

20 Te ni cahān gā yā:

Jeē quénda ini anuá ñayuu, yūcuan cúu jeē kujnehén i sáha.

21 Chi nde ini anuá ñayuu quénda jeē jéni néé ni, jeē casíquí ndéē jnáhan, jeē jíca jnéni, jeē jéhni ndíyi,

22 jeē sacuíhná, jeē ndíyo ni ndajníñu jnáhan, jeē sáha néé, jeē stahú jnáhan, jeē máni cuēchi sáha, jeē cucuésún ni, jeē cahán yāa síquī jnáhan, jeē sandúxí máá, jeē canéé xínī.

23 Tācá jniñu néé yáha, máni ini anuá ñayuu quénda, te cújnehén i sáha, áchí yá.

*Ñahan inga nación jeē ní candíje nīhin
(Mt. 15.21-28)*

24 Te ni quenda ya yūcuan cuáhān yā región Tiro jíin Sidón. Te ni quīvi ya ñn vehe, te cúní yā jeē tú ni ñn ñayuu cuni jeē íne ya yūcuán. Te vēsú súcuan, te tu ní cúu cone sāhi yá.

25 Te ñn ñahan íyó séhe síhí ña jeē ñúhun tachī ini i, ni nihīn-ni ña jnūhun jeē íne ya. Te ni quee ña, te ni jecuiñī yití ña nuū jehé yā.

26 Te ñahan ñuu jicá cúu ña, chi nde Sirofenicia cúu nación ña. Te ni cahān ndahú ña jíin yá jeē na quénehen ya tachī ini sēhe síhí ña.

27 Te ni cahān Jesús jíin ña:

Nasūu núu maá ní vēji ná, chi máni nuū ñáyuu cácuu sēhe Israel. Chi tu íyó váha jeē quénde yō staā sēhe te cuāha yó núu ína, achí yá.

28 Te ni cahān ña:

Jendaá cahán ni Tátā, te chindéé ñáhán ní sáña vēsú cúu ná nájnūhun ina. Chi suni máá tí cáhīn tí chíji mesa, cánihīn tí staā cuechí jēé cóyo yuhu sūchi lúli cáyeji tí, achí ña.

29 Yūcuán na te ni cahān yā jíin ña:

Váha ni cahān ní. Cuáhán ní núu súcuan, chi je ni quenda tachī ún ini sēhe síhí ní, achí yá.

30 Te ni najinū ña vehe ña, te ni jito ña jeē catú sēhe síhí ña nuū jíto, te je ni quenda tachī ún ini i.

Jeē ní nasávāha ya ñn tēe sóhó cástété

31 Te ni quenda tucu ya región Tiro, ni yāha ya Sidón jíin táca ñuu Decápolis, te ni jinū yā mar Galilea.

32 Te ni caquindeca i ñn tēe sóhó cástété nuū yā, te ni cacahān ndahú i jíin yá jeē na sóo yá ndaha ya siquī de.

³³ Te ni quenehen s̄in ya de nuū ñáyuu cuehē ún, te ni chune ya xinī ndáha ya sōho de, te ni tes̄hi yá, te ni quehé yá yaá de.

³⁴ Te ni ndacoto ya ichi ándiví, te ni jitū ni yā, te ni cahān yā:

Efata, achí yá, jeē cuní cahān: Nanune.

³⁵ Te ni nanune-ni sōho de, te ni nduvāha yáa de, te ni nacahān vāha de.

³⁶ Te ni ndacu ya jniñu nuū ñáyuu un jēē ma cáchi i nuū ní ñn. Te vēsú ni cahān nihin ya jíin i, te víhyá gā ni cajete i jnūhun.

³⁷ Te yōhyo ni canaa ni i cájito i, te ni cacahān i:

Vāha sáha ya tācá jniñu, chi nde tēe cásóhó, cánacuni sōho de, te tēe cándāa ñihín, cánacahān vāha de sáha ya, achí i.

*Jeē ni scáji yā cuūn mil ñayuu
(Mt. 15.32-39)*

8

¹ Te tiempo un ní candutútú cuehē ndasí ñáyuu, te tuá na vé caji i. Te ni cana Jesús tēe cáscuáha jíin yá, te ni cahān yā:

² Cúndáhú ni rī ñayuu yāhá, chi je ni cuu unī quiṽi cáyūcú i jíin rí, te tuá na vé caji i.

³ Te núu natají rí i quinhun ndite i vehe i, te cuíta íi i sava ichi, chi íyó sava i jeē jicá véjicoo i, achí yá.

⁴ Te tēe cáscuáha un ní cacahān de:

¿Te ndé nuū nihín yō staā caji i jíināhan i? Chi yāhá tú na ñayuu yúcu, achí de.

⁵ Te ni cajnūhun yá de:

¿Nasaa staā cánevāha ró?

Te ni cacahān de:

Uxā-ni, áchí de.

⁶ Yūcuán na te ni cahān yā jíin ñáyuu cuehē un jēē na cúcōo i. Te ni quihin ya ndihúxá staā ún, te ni nacuatáhú yá nuū Yaā Dios. Te ni tahu cuéchí yá, te ni jēhe ya nuū téē cáscuáha jíin yá. Te máá de ni casaja de nuū ñáyuu cuehē ún.

⁷ Te suni cándiso de jecu chācá lúli. Te ni nacuatáhú yá síquī, te ni cahān yā jeē suni saja de jíjnáhan de.

⁸ Te ndíhi i ni cayeji, te ni candutú chíji i. Yūcuán na te ni canastútú de pedazo jeē ní quendōo, te ni chitú úxā jíca.

⁹ Te téē ni cayeji un, íyó nájnūhun cuūn mil de. Te ni nacuatáhú yá nuū ñáyuu ún, te cuanungoo i.

¹⁰ Yūcuán na te ni ndívi-ni ya ini barco jíin téē cáscuáha jíin yá, te cuahān yā región Dalmanuta.

*Jeē ní cajicān de ñn jniñu jéhnu nuū yā
(Mt. 16.1-4; Lc. 12.54-56)*

¹¹ Yūcuán na te ni quecoo téē grupo fariseo, te ni caquejéé de stíchí de Jesús. Te cácuni de coto ndee de ya, te ni cajicān de jeē sáha ya ñn jniñu jéhnu jeē coo ñn seña ichi ándiví.

¹² Te ni jítū ni yā síquī jeē tu cácdíje de jíjnáhan de, te ni cahān yā:

¿Naun cájicān ñáyuu yáha ñn jniñu jéhnu nuū rī? Jendaá cahán rī jeē ma stéén rī ni ñn jniñu jéhnu nuū ñáyuu yáhá.

¹³ Te ni squéndōo ya de jíjnáhan de, te ni ndívi tucu ya ini barco, te cuahān yā inga lado mar.

*Jnūhun levadura téē fariseo
(Mt. 16.5-12)*

14 Te tēe cáscuáha jíin yá ni canaa ni de condiso de jeē cáji de, chi ñin-ni pan cánevāha de ini barco.

15 Te ni ndacu ya jniñu nuū de:

Coto má candíje ró levadura tēe grupo fariseo jíin levadura Herodes, achí yá.

16 Te ni cacahān tēe cáscuáha un jíin táca jnāhan de:

Va siquī jeē tú na staā ndíso yó, jeē yúcuan cáhān yā súcuan, achí de.

17 Te ni jini Jesús, te ni cahān yā:

¿Najehē cándajnūhun ró jeē ni cáhān rī súcuan siquī jeē tú na staā cándiso ró? ¿A ná tu cuni rō, á ná tu jecūhun ni rō jeē tu ní cáhān rī súcuan siquī jeē tu cándiso ró stāā? ¿A yóhyo uun ni rō candíje ró?

18 Iyó tñūu ró ¿te á tu cájito ró? Iyó sóho ró ¿te á tu cájini ró? ¿Te á tu cánucūhun ni rō?

19 Chi ná ni tahu cuéchí rí uhūn staā ni cayeji uhūn mil tēe, ¿te nasaa jíca ni chitú pedazo staā jeē ní canastútú ró? Achí yá.

Te ni cacahān de:

Uxī uū jíca, achí de.

20 Te suni súcuan ná ni tahu cuéchí rí uxā staā ni cayeji cuūn mil tēe, ¿te nasaa jíca ni chitú pedazo staā jeē ní canastútú ró? Achí yá.

Te ni cacahān de:

Uxā jíca, achí de.

21 Te ni cahān yā jíin de:

Te nde vijna ¿á ná tu jecūhun ni rō jijnāhan ró?

Súcuan ni cahān yatá yá jeē ma cándíje de jnūhun stáhú cástéén tēe ún.

Jeē ní nasávāha ya tēe cuáá ñuu Betsaida

²² Yūcuán na te ni jinū yā jiín de ñuu Betsaida. Te ni caquindeca ñayuu ñn tēe cuáá núū yā, te ni cacahān ndahú i jíín yá jeē na tēe ya ndaha ya nuū de.

²³ Yūcuán na te ni jñi ya ndaha tēe cuáá un, te ni quenehen ya de yatā ñūū ún. Te ni tee ya tesīhi yá tinūú de, te ni tee ya ndaha ya siquī. Te ni cajñūhun yá de núu cuu coto de jecu.

²⁴ Te ni ndacoto de, te ni cahān de:

Jíto ná ñayuu jeē cájica i, te tu jíto cájí ná, chi ná cáa yujnu cáa i, áchí de.

²⁵ Yūcuán na te ni tee tucu ya ndaha ya siquī tinūú de. Te ni ndacoto vāha de, te ni nduvāha-ni tinūú de, te ni jito cájí de ndihi-ni.

²⁶ Te ni natají yá de quinhun de vehe de, te áchí yá:

Ma quívi ró ñuu, ni ma cáchi cuiti rō nuū ní ñn, áchí yá.

*Jeē ni cáhān Pedro jeē Jesús cúu Cristo
(Mt. 16.13-20; Lc. 9.18-21)*

²⁷ Yūcuán na te Jesús jiín tēe cáscuáha jíín yá, cuahān yā tācá ndañūū Cesarea Filipo. Te ichi un ní cajñūhun yá de:

Ruhū, ¿ndé ñn cúu ri cácahān ñayuu?

²⁸ Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jñūhun Yaā Dios nde jenahán. Te sava ga i cácahān jeē inga tēe ni nacani jñūhun Yaā Dios cúu ní.

²⁹ Yūcuán na te ni cajñūhun yá de:

Te máá ró, ¿ndé ñn cúu ri cácahān rō?

Te ni cahān Pedro:

Máá ní cúu Cristo, Yaā ní tají Yaā Dios, achí de.

³⁰ Te ni ndacu ya jniñu nuū de jíjnáhan de jeē ma cáchi de jnūhun yáha nuū ní ññ ñayuu.

*Jeē ní castūhún Jesús jeē cúū yā
(Mt. 16.21-28; Lc. 9.22-27)*

³¹ Te ni quejéé yá steén yā nuū de:

Máá rí, Yaā ní nduu tēe, cánuú ndoho xeēn rī. Te tāca tēe jéhnū jíín sūtū cácujuhūnū jíín tēe cástéén tutu ley, squéhichī de ruhū, te cahni de ruhū. Te nuū uní quivī te natecu rī, achí yá.

³² Te cájí ní cahān yā jnūhun yáha. Yūcuán na te Pedro, ni cana máñúhún de ya, te ni quejéé de cáhán de nuū yā jeē ma cuáha ya jnūhun coo súcuan.

³³ Te máá yá ni ndió cóto ya ni jito ya nuū tēe cáscuáha jíín yá. Te ni cahān yā nuū Pedro:

Cujiyo quihīn rō, chí cáhán rō ná cáhán Satanás. Chí tu jéni ni rō nájnūhun jéni ni Yaā Dios, chí sa suhva jéni ni rō nájnūhun cájeni ni ñayuu, achí yá.

³⁴ Te ni cana ya tēe cáscuáha jíín yá jíín ñayuu cuehē ún, te ni cahān yā:

Na-ni ñayuu núu cúní i condiquīn i ruhū, na cási i jeē cúní maá i, te na cóndiquīn i ruhū te cuāha i jnūhun ndoho i jnūndóho jeē síquí rī, vēsú na cúū i.

³⁵ Chí núu ndé ñayuu cúní i cācu i nuū jnúndóho quiji nuū i jeē síquí ruhū, núu súcuan te jnahnū ndetū i ññ cáni. Te núu ndé ñayuu, vēsú na cúū i jeē síquí ruhū jíín síquī jeē scáca i jnūhun jeē jnáma ri ñayuu, núu súcuan te cotecu i ññ cáni.

³⁶ ¿Chí ndé cuajniñu vēsú na cúndeyí ñayuu nihīn i ññ ñáyiví, te núu quiví i nuū jnahnú ndetū i?

³⁷ Chí tú na jíín cuiti chunaa ñayuu jeē cácu ánuá i.

³⁸ Te ñayuu yáha tu cá candíje cuiti i, te máni máá cuéchi cásáha i. Te núu na-ni ñayuu cúcanu i nuū ñayuu yáha jeē síquí ruhū, Yaā ní nduu tēe, jíin síquí jnúhun cáhán rī, suni súcuan cucanu rī jeē síquí máá i, quiṽi ndíji ri jíin táca ndajéhé ndoo ri. Te quiṽi ún chi yōhyo luu kujéhnū ri nájñūhun cújéhnū Tátá rī. Achí yá.

9

¹ Te suni ni cahān yā jíin de jíjnáhan de:

Jendaá cahán rī jíin ró jeē sava tēe cáhīn yāhá, ma cúu de chi nde cuni de jeē ndácu Yaā Dios jniñu jíin poder yā, achí yá.

*Jeē tucu ni nduu ya
(Mt. 17.1-13; Lc. 9.28-36)*

² Yūcuán na te nuū iñú quiṽi te Jesús ni jeca ya Pedro jíin Jacobo jíin Juan, cuahān sán ya jíin de ñn yucu súcún. Te yūcuán, tucu ni nduu ya nuū de.

³ Te sahma ya ni ndindēé, te ni nducuíjín quiyi, nájñūhun yuhvā volcán. Te tú ni ñn ñayuu ñayīvi yáha cuu nacate jeē ndúquiyi ndasí súcuan.

⁴ Te ni cajito de jeē Elías jíin Moisés cándajnūhún de jíin yá.

⁵ Yūcuán na te ni cahān Pedro jíin Jesús:

Maestro, nacā jeē váha jeē cáhīn na yáha. Te na sáha ná únī vehe ramada, ñn cuu máá ní, inga cuu Moisés, te inga cuu Elías, achí de.

⁶ Chi yōhyo ni cayūhu tēe cáscuáha ún, te Pedro tu ní sáha de cuenta na vé cúu jeē cahán de.

⁷ Te ni quiji vicō nūhun ní jesi-ni nuū de. Te nuū vicó un ní cahān ñn jñūhun:

Yāha cūu Sēhe ri jeē maní ndasí rí jíin. Te na cúni nahín ró jnūhun cáhán yā. Achí.

⁸ Te ni candacoto-ni de, te tuá tēe un ní cájito de, chi máá ñn na Jesús.

⁹ Te ni cananuu de jíin yá yucu ún. Te ni ndacu nīhin ya jniñu nuū de jeē ma cáchi de nuū ní ñn jeē súcuan ní cajito de, chi nde na nátecu maá yá, Yaā ní nduu tēe, áchí yá.

¹⁰ Jeē yúcuan ní cachuvāha de tāca jéē ní cuu ún, te cácajnūhun jnáhan de na jnūhun cūu jeē nátecu yā.

¹¹ Te ni cacajnūhún de ya:

Te tēe cástéén tutu ley Yaā Dios, ¿najahē cácahān de jeē cánuú ndiji Elías xīhna gā, te sáá te quiji Yaā cūu Cristo? achí de.

¹² Te ni cahān yā:

Jendaá cūu jeē xīhna gā quiji ñn tēe cūu nájñūhun Elías, te sátūhva de ndihí, áchí tutu. ¿Te ndese cáhán tucu tutu iī siquī ruhū, Yaā ní nduu tēe? Cáhán jeē ndoho xeēn rī, te sájéē ni i nuū rī.

¹³ Te cáhán rī jíin ró jeē jé ni quiji tēe ni cuu nájñūhun Elías, te ni casáha ndevāha ñayuu jíin de tāca jéē ní cacuu ni maá i, nájñūhun cáhán jnūhun de nuū tútu, áchí yá.

*Jeē ní nasávāha ya ñn sūchi ñūhun tachī ini
(Mt. 17.14-21; Lc. 9.37-43)*

¹⁴ Te ni najinū yā jíin de nuū sava ga tēe cáscuáha jíin yá, te ni cajito ya ñayuu cuehē ndasí, ni cajicó ndúu i de. Te suni cáhīn tēe cástéén tutu ley Yaā Dios, cátejnáhan jíin de.

15 Te nuū ní cajito tāca ñáyuu un jéē véji ya, te ni canaa ni i. Te cájину i cuangoo i nuū yā jeē cahān i jíin yá.

16 Te ni cajnūhun yá i:

¿Na siquī cátejñáhan ró jíin de jíjnáhan de? áchí yá.

17 Te ni cahān ñn tēe íne yūcuán:

Maestro, vendeca ná séhe ná núū ní, chi ñúhun ñn tachī ini i, te ni cuññín i ni sáha.

18 Te ndé-ni cúu nuū íne i, te tachī un scótúú i, te jéhni yíhí-ni i. Te jéē tiñū yuhu i, te squíññi jnúhun i. Te cuacuxíí ndasí i sáha. Te ni cahān ndahú ná jíin tēe cáscuáha jíin ní jeē na quénehen de tachī ún, te tu ní cúu sáha de, áchí de.

19 Te ni cahān yā jíin de jíjnáhan de:

Ñayuu tu cándíje cuiñi cácuu ró. ¿Nasaa ga quiñvī condee rī jíin ró? ¿Te nasaa ga quiñvī cuandeyí ni rī jíin ró? Cuáquihin sūchí un, na quiñi i, áchí yá.

20 Te ni caquindeca de i nuū yā. Te nuū ní jito tachī un núū yā, te ni jehni yíhí-ni i. Te ni cotúú i, te cónehén cócáni i, te jéē tiñū yuhu i.

21 Te Jesús ni cajnūhun yá tatá i:

¿Nasaa cuiyā ni cuu jeē sáha súcuan jíin i?

Te ni cahān de:

Nde lulí i.

22 Te ni cuu cuehē jínu scótúú táchí ún i nuū ñuhún nuū ndúte, jeē cáhni i cúní. Te núu cuu sáha ní, te cundáhú ni ní chindéé ñáhán ní sãña jéē ndúvãha sēhe ná, áchí de.

23 Te ni cahān Jesús jíin de:

Núu cuu candíje ró jéē sáha ri, chi ñayuu candíje te cuu tāca jéē cuní i, áchí yá.

24 Te máá tatá sūchí un ní cahān jee de:

Cándije ná, te chindéé ñáhán ní sãña jéē candije nīhin ga ná, áchí de.

²⁵ Te ni jito Jesús jeē ní cutútú cuéhē ñayuu nuū yā. Te ni cahān yā nuū tachí:

Tachī jeē sañihín sásóhó, ruhū ndácu ri jniñu jeē na quénda ró ini sūchi yáha, te ma ndívi ga rō ini i, áchí yá.

²⁶ Yūcuán na te ni cana cóhó táchī ún, te ni jehni yihí tucu i, te ni quenda cuahān. Te sūchí un ní cuu i nájnūhun ndívi. Te ni cacahān cuehē ñayuu jeē jé ni jihī i.

²⁷ Te Jesús ni jn# ya ndaha i, te ni ndonehen ya i, te ni nucuñiñi i.

²⁸ Yūcuán na te ni quívi ya ini iin vehe, te tēe cáscuáha jíin yá, ni cacajnūhun sīn de ya:

¿Najehē tu ní cúu quenehen ná tachī un jíjnáhan ná? áchí de.

²⁹ Te ni cahān yā:

Iin tachī súcuan chi ma quénda cuiti te núu tú cacān tahú rō te coo ndite ni rō, achí yá.

Jeē ni cáhān tucu ya jeē cúu yā

(Mt. 17.22-23; Lc. 9.43-45)

³⁰ Te ni quenda ya yūcuan jíin de jíjnáhan de, te ni yáha ya ndañúu Galilea cuahān yā. Te tu ní cúní yā jeē cúní ni iin ñayuu.

³¹ Chi stéén yā nuū tēe cáscuáha jíin yá, te áchí yá:

Máa rí, Yaā ní nduu tēe, nastúu i ruhū nuū tāca tēe xeēn. Te cahni de ruhū, te núu ni jihī rī, te nuū uní quívi te natecu rī, achí yá.

³² Te tu ní cájecūhun ni de jnūhun yáha, te cáyūhú de cajnūhún de ya siquī jnūhun ni cahān yā.

*Ndé ñáyuu cúu jeē cujéhnu ga
(Mt. 18.1-5; Lc. 9.46-48)*

³³ Te ni jinū yā jín de ñuu Capernaum, te nuū ni quívi ya ini vehe, te ni cajnūhun yá de:

¿Na jnūhun ni candajnūhun ró ichi véji yó? áchí yá.

³⁴ Te tu ní cácahān cuiti de, chi ichi un ní cacahān de siquī núu ndé ñn de cújéhnu ga.

³⁵ Yūcuán na te ni cucōo ya, te ni cana ya ndihúxí uū de, te ni cahān yā:

Núu ndé ñn ró cúní cujéhnu ga, na cúu ró tée núu ga nuū tāca jnáhan ró, te cuajníñu ró núu jnáhan ró.

³⁶ Yūcuán na te ni jñi ya ndaha ñn sūchi lúlí, te ni jeni ya i mēhñú de jínáhan de. Te ni nundee yā i, te ni cahān yā jín de:

³⁷ Na-ni ñayuu núu jeē siquí ruhū jetáhú i ñn sūchi lúlí nájñūhun sūchi yáha, te ruhū jetáhú i. Te ñayuu jetáhú rúhū, nasūu máá ñn-ni ruhū, chi suni Yaā ní tají rúhū jetáhú i, áchí yá.

*Ñayuu tu cáhán siquī yā, ñn i jín yá
(Mt. 10.42; Lc. 9.49-50)*

³⁸ Yūcuán na te ni cahān Juan jín yá:

Maestro, ni cajito ná ñn tēe jeē jín sñví ní quénehen de tachí ini ñayuu. Te ni cajesí ná jēe sáha de, chí tu jíca de jín yó, achí de.

³⁹ Te ni cahān Jesús jín de:

Ma cási rō jeē sáha de. Chi ni ñn tēe jeē jín sñví rí sáha de jñiñu jéhnu, ma cúu nacahān de siquī rī.

⁴⁰ Chí tēe tu cáhán siquī yō, ñn de jín yó.

⁴¹ Te na-ni ñayuu núu jeē siquí ruhū cuāha i vēsú ñn ñajin ndute coho ró, siquī jeē cácañdije ró ruhū, ndaā ndije cúu jeē nihín i tahū i. Achí yá.

*Xeēn coo siquī ñáyuu quívi nuū cuéchi
(Mt. 18.6-9; Lc. 17.1-2)*

⁴² Te núu ñn sūchi lúli yáha cándíje i ruhū, te núu quívi i cuéchi sáha na-ní ñayuu, te vāha ga núu ní conuhnī ñn yōso cáhnu sucūn ñayuu ún, te quēe i chíji ndute mar nuú.

⁴³ Te núu ndaha ró sáha jeē quívi ró cuéchi, vāha ga cahnde rō na quíhín, návāha tuá sáha ró cuéchi. Chi vāha ga jeē cóndee ñn-ni ndaha ró te quívi ró núu cotecu rō ní cáni, vēsú jeē cóndee ndíndúú ndaha ró te quívi ró infierno, nuū cayú ñuhūn jeē ma ndahvá cuítí.

⁴⁴ Te yūcuán chí tu cájihī tindacú, te tu ndáhvá cuítí ñuhūn.

⁴⁵ Te núu jehē rō sáha jeē quívi ró cuéchi, suni vāha ga cahnde rō na quíhín, návāha tuá sáha ró cuéchi. Chi vāha ga jeē cóo cúhndu ró te quívi ró núu cotecu rō ní cáni, vēsú jeē cóndee ndíndúú jehē rō te quívi ró infierno, nuū cayú ñuhūn jeē ma ndahvá cuítí.

⁴⁶ Te yūcuán chí tu cájihī tindacú, te tu ndáhvá cuítí ñuhūn.

⁴⁷ Te núu tinūu ró sáha jeē quívi ró cuéchi, vāha ga tava ró na quíhín, návāha tuá sáha ró cuéchi. Chi vāha ga jeē quívi ró ñuu nuū ndácu Yaā Dios jniñu jíin ñn na tinūu ró, vēsú jeē cóndee ndíndúú tinūu ró te quívi ró infierno.

⁴⁸ Te yūcuán chí tu cájihī tindacú, te tu ndáhvá cuítí ñuhūn.

⁴⁹ 'Chí nájñuhun quénda vāha oro sáha ñuhūn, súcuan quénda vāha ñayuu sáha jñúndóho. Te tāca cúñu jeē socó ñayuu nuū yā, cúhuhvuá sáha ññ.

⁵⁰ Vāha íyó ññ, te núu ññ ún na náā jeē uhvuá, ¿te

ndese nduu uhvuā tucu sáha ró? Núu súcuan te cuu ró ñáyuu váha, nájñūhun íyó váha ñī. Te na cóyūcu váha ró jíin jnáhan ró. Achí yá jíin de.

*Siquī jeē ma stóo jnáhan tēe jíin ñahan
(Mt. 19.1-12; Lc. 16.18)*

10

¹ Te ni quenda ya ñuu Capernaum, te ni jinū yā región Judea, inga lado yūte Jordán, ichi nuū cáne niāndii. Te yūcuan ní cutútú tucu ñayuu nuū yā, te ni steén tucu ya jñūhun nuū i, nájñūhun sáha ya.

² Yūcuán na te jecu tēe grupo fariseo ni quecoo de nuū yā, chi cáconi de coto ndee de ya núu ndese cahān yā. Te ni cacajñūhún de ya núu íyó ley jeē cuu ndusñin ñin tēe jíin ñasihí de.

³ Te ni cahān yā jíin de:

¿Na jniñu ni ndacu Moisés nuū rō nde jenahán?

⁴ Te ni cacahān de:

Moisés ni jēhe de jñūhun jeē cúvāha ñin acta jeē ndusñin de jíin ña, te ndōo ña, achí de.

⁵ Te ni cahān Jesús jíin de:

Siquī jeē níhni ni rō jijnáhan ró, jeē yúcuan ní ndacu de jniñu yáha núu rō.

⁶ Te nde xīhna ñúhún, ná ni sáha Yaā Dios ndihí, chi tēe jíin ñahan ni sáha ya.

⁷ Jeē yúcuan cúu jeē stóo tēe tátá de náná de, te quijnáhan de jíin ñasihí de.

⁸ Te ñin na cuu ndindúú de, achí Yaā Dios. Núu súcuan te tuá cúu uū jnáhan de, chi ñin na cúu.

⁹ Jeē yúcuan tu íyó váha jeē stóo jnáhan, chi jeē ni squíjñáhan Yaā Dios cúu, achí yá.

¹⁰ Te tēe cáscuáha ún nuū ni quívicoo de vehe, te ni cacajñūhún tucu de ya siquī jnúhun ún.

11 Te ni cahān yā jín de:

Núu ndé téē stóo de ñasihí de te condeca de inga ñahan, núu súcuan te cásiquí ndéē de ñasihí de.

12 Te núu ñn ñahan stóo ña yñ ña te condeca ña inga tēe, suni cásiquí ndéē ña de. Achí yá.

Jeē ni jicān tahu Jesús jehē sūchi lúlí
(Mt. 19.13-15; Lc. 18.15-17)

13 Yūcuán na te ni quecoo ñayuu jín sūchi lúlí, jēē na sóo yá ndaha ya xinī i. Te tēe cáscuáha jín yá, ni cacahān de nuū ñáyuu vējicoo jín i.

14 Te ni jito Jesús, te ni quitī ni yā, te ni cahān yā jín de:

Cuāha jnūhun na quíjicoo sūchi lúlí jínā nuū rī, te ma cási rō jeē quíjicoo i. Chi ñayuu jeē ndió cóo ni i cani ni i nájnūhun sūchi yáha, suu i quívi ndaha Yaā andiví jeē ndacu ya jniñu nuū i.

15 Te jendaá cahán rī jín ró, núu ñn ñayuu tú cuatáhú i jeē ndácu Yaā Dios jniñu nuū i, nájnūhun jétáhú ñn sūchi lúlí, ma quívi cuiñi i ndaha ya, achí yá.

16 Te ni nundee ya i, te ni sóo yá ndaha ya xinī i, te ni jicān tahu yā jehē i jínáhan i.

Jnūhun tēe cúcá
(Mt. 19.16-30; Lc. 18.18-30)

17 Yūcuán na te ni quihin tucu ya ichi cuahān yā. Te jínu ñn tēe ni quee de, te ni jecuiñi yití de nuū yā, ni cajnūhún de ya:

Tēe vāha cúu ní Maestro. Te cachi ní, ¿na jniñu váha sáha ná te nihñn tahu na cotecu na ní cani andiví? áchí de.

18 Te ni cahān yā jín de:

¿Naun cáhán rō jeē téē vāha cúu ri? Tú ni ñn tēē vāha íyó, chí máá ñn-ni Yaā Dios.

¹⁹ Je jíni rō tācá jniñu ní ndacu Yaā Dios: Ma cosíquí ndēē jnáhan rō. Ma cáhni rō ndíyí. Ma sacuíhná rō. Ma sajnúhún rō. Ma stahú rō jnáhan rō. Cuatáhú rō nuū tatá rō nuū naná rō. Achí yá.

²⁰ Te ni cahān tēē un jíin yá:

Tācá jniñu yáha je ni squícu ná ndé ná lulí ná, Maestro, achí de.

²¹ Yūcuán na te ndáhú jíto ya nuū de jeē cúsi ni yā jíin de. Te ni cahān yā:

Ñn na jniñu cúmaní sáha rō núu súcuan. Cuáhán te xīco rō ndíhi jeē névāha rō, te cuāha rō núu ñáyuu ndahú. Te nde andiví cuāha ya jeē váha ndasí núu rō. Yūcuán na te quiji rō condiquín rō ruhū, te cuāha rō jnúhun ndoho rō jnúndóho jeē síquí rí, achí yá.

²² Te ná ni jini sōho de jnúhun yáha, te ni jnahuhū ni de, te cúcuíhyá ni de cuahān de, chí cúcá ndasí de.

²³ Yūcuán na te Jesús ni ndacoto ya ní xiin ya, te ni cahān yā jíin téē cáscuáha jíin yá:

Tēē cúcá chí yōhyo yí quívicoo de ndaha Yaā Dios jeē ndacu ya jniñu nuū de, achí yá.

²⁴ Te tēē cáscuáha jíin yá, yōhyo ni canaa ni de jeē ní cajini de jnúhun ni cahān yā. Te ni cahān tucu ya jíin de:

Séhē, ñayuu ténuū xūhún, yōhyo yí quívicoo i ndaha Yaā Dios jeē ndacu ya jniñu nuū i.

²⁵ Yachī gā yáha ñn camello yaū yutícuí, vēsú jeē quívi ñn ñayuu cucá ndaha Yaā Dios jeē ndacu ya jniñu nuū i, achí yá.

26 Te víhyá gā ni canaa ni de cájini de, te ni cacajñūhun jñáhan de:

¿Ndé ñáyuu cúu jeē cácu núu súcuan?

27 Te ni ndacoto ya nuū de, te ni cahān yā:

Ñayuu chi ma cúu squívi i máá i ndaha Yaā Dios, te máá yá chi cuu sáha ya, chi ndihí-ni jniñu cuu sáha ya, achí yá.

28 Yūcuán na te ni cahān Pedro jíin yá:

Sāña jíjñáhan ná, ní castóo ná ndihí jeē cánevāha ná, te cándiquīn na níhín, áchí de.

29 Te ni cahān Jesús:

Jendaá cahán rī jíin ró jíjñáhan ró, núu na-ni ñayuu stóo i vehe, chí ñani, chí cuáha, chí tátá, chí náná, chí ñasihí, chí séhe, chí ñuhun, jeē siquí ruhū jíin síquī jeē scáca i jñūhun jeē jnáma rī ñayuu,

30 núu súcuan te nanihīn i ñn ciento gā jeē súcuan vijna, cúu vehe, cúu ñani, cúu cuáha, cúu náná, cúu séhe, cúu ñuhun, te nde jíin jéē cóto xeēn ñayuu i. Te nde inga vida quiji te cotecu i ní cáni.

31 Te cuehē ñayuu jeē vijna cácujuhnu, nduu i ñayuu núu ga. Te ñayuu jeē núu ga vijna, chi ndujéhnu i, áchí yá.

Jeē ni cáhān tucu ya jeē cúu yā

(Mt. 20.17-19; Lc. 18.31-34)

32 Te cáñuhun de ichi jeē cáa cuahān ñuu Jerusalén. Te Jesús yósnúu yá nuū tée cáscuáha ún. Te canaa ni de ni cajini sōho de jñūhun ni cahān yā. Te cáyūhú de cuángoo de jíin yá. Yūcuán na te ni cana sīn tucu ya ndihúxí uū tée cáscuáha, te ni quejéé yá cástūhún tucu ya nuū de tāca jéē quíji síquī yā.

33 Achí yá:

Cuni sōho ró, chi je cuángoo yó ñuu Jerusalén vijna, te yūcuán nastúu ñayuu ruhū, Yaā ní nduu tēe, nuū sutú cácujuhnu jíin núu tēe cástéén tutu ley. Te ndonda de siquī rī jeē cúu rī, te squívī de ruhū nuū tēe nación Roma jeē cáyūcú Jerusalén cándacu jniñu.

³⁴ Te tāca tēe un sácatā de nuū rī, te cani de ruhū, te tesihí de nuū rī, te sáá te cahni de ruhū. Te nuū uní quívī te natecu rī, achí yá.

*Jeē ni jíicān Jacobo jíin Juan ñn favor nuū yā
(Mt. 20.20-28)*

³⁵ Yūcuán na te Jacobo jíin Juan, ndindúú séhe Zebedeo, ni quecoo de nuū Jesús, te ni cacahān de: Maestro, cácuni na jēe sáha ní ñn jeē cacán na núu ní, achí de.

³⁶ Te ni cahān yā jíin de:

¿Ndese cácuni rō jeē sáha ri jíin ró? achí yá.

³⁷ Te ni cacahān de:

Cuāha ní jnúhun jeē cónēne ná xiin ní quívī ndujéhnu ní, ñn ná lado váha ní, te inga ná lado jecó ní, achí de.

³⁸ Yūcuán na te ni cahān Jesús jíin de:

Tu cájini rō na vé cúu jeē cájicān rō. ¿A cuu ndoho ró jnúndóho nájnūhun jeē quíji siquī rī? ¿Te á canda ró ndoho xeēn rō nájnūhun ndoho ri? achí yá.

³⁹ Te ni cacahān de:

Cuu sáha ná.

Te ni cahān yā jíin de:

Jendaá jeē ndoho ró jnúndóho nájnūhun jeē quíji siquī rī, te ndoho xeēn rō nájnūhun ndoho ri.

⁴⁰ Te jeē cónēne ró lado váha ri jíin lado jecó rí, nasūu rúhū cúu jeē cuáha jnúhun. Chi je íyó túhva

cuu tāca tēe jeē ní nacāji Tátá rī, te tēe un níhīn, achí yá.

⁴¹ Te uxī gā tēe cáscuáha un, ní cajini de jnūhun yáha, te ni caquítī ni de nuū Jacobo jíin Juan.

⁴² Te Jesús ni cana ya de, te ni cahān yā jíin de:

Cájini rō ndese cásáha tēe cácujuhnu nuū ñáyuu tācá nación. Chi cándacu nīhin de jniñu nuū i, te máá de cáchí ndese coo.

⁴³ Te máá ró jijnáhan ró, chi ma sáha ró súcuan. Chi núu ndé ñn ró cúní cujéhnu, sa suhva cuajníñu ró núu jnáhan ró.

⁴⁴ Te núu ndé ñn ró cúní cuu nuū, sa suhva sáha ró máá ró mozo nuū tāca jnáhan ró.

⁴⁵ Chi suni súcuan sáha ruhū, Yaā ní nduu tēe, chi nasūu jéē véji ri jeē cuajníñu ñayuu nuū rī, chi sa suhva véji ri jeē cuajníñu ri nuū ñáyuu. Te cuāha ri máá rí cuu rī návāha jnama ri cuehē ñayuu, achí yá.

Jeē ní nasávāha ya Bartimeo tēe cuáá

(Mt. 20.29-34; Lc. 18.35-43)

⁴⁶ Yūcuán na te ni jinū yā ñuu Jericó jíin tēe cáscuáha jíin yá. Te sáá te ni quenda ya yūcuan jíin de jíin ñáyuu cuehē ndasí. Te Bartimeo tēe cuáá, sēhe Tímeo, néne de yuhíchi, jíicán de caridad.

⁴⁷ Te ni jini de jnūhun jeē Jesús ñuu Nazaret véji ya. Te ni quejéé de cána jee de:

Jesús Séhe yucūn David, cundáhú ni ni sáña, áchí de.

⁴⁸ Te cuehē ñayuu ni cacahān i nuū de jeē na cási de yuhu de. Te máá de víhyá gā ni cana jee de:

Máá ní jeē cúu ní Séhe yucūn David, cundáhú ni ni sáña víí, achí de.

⁴⁹ Yūcuán na te ni jecuiñī Jesús, te ni cahān yā:

Cana de na quíji de.

Te ni cacana i tēe cuáá un:

Ndeyí coo ni rō. Ndocuiñi, na quíhín yō, chi cána ya rohó, áchí i jíin de.

⁵⁰ Yūcuán na te ni scáne de ticāchí de, te yachī ni ndocuiñi de, te ni jinū de nuū Jesús.

⁵¹ Te ni cahān yā jíin de:

¿Na vé cuní rō jeē sáha ri jíin ró?

Te máá de ni cahān de:

Maestro, jeē na ndúndijin tinūu ná cuní na, áchí de.

⁵² Te ni cahān Jesús jíin de:

Cuáhán núu súcuan. Ni candíje ró jeē cuu nasávāha ri rohó, te jeē yúcuan ní nduvāha ró, áchí yá.

Te ni ndundijin-ni tinūú de, te ni ndiquīn de Jesús cuahān de jíin yá ichi ún.

*Jeē ni quívi Jesús ñuu Jerusalén
(Mt. 21.1-11; Lc. 19.28-40; Jn. 12.12-19)*

11

¹ Te ni cuyajni ya ñuu Jerusalén, vēji ya ñuu Betfagé jíin ñuu Betania, jeē íne jehē yucu Olivos. Te ni tají yá uū tēe cáscuáha jíin yá jeē quíngoo de.

² Te áchí yá jíin de:

Cuángoo ñuu lulí íne ichi núú. Te núu ni quívi-ni ró yúcuan, te nihīn rō ñn burro núhni tī, jeē ní ñn tēe ná tu coso de tī. Te ndají ró tī, quiijicoo ró jíin tī.

³ Te núu ndé ñn cajnūhún naun cándají ró tī, te cachi rō: Máá Jítoho yō jíni ñúhún yá tī, te yachī natají yá tī ndiji tī, achi rō. Achí yá jíin de.

⁴ Te cuango de, te ni canihīn de burro un núhni tī yehyí núu quéhe nuū náquijnáhan ichi. Te ni candají de tī.

⁵ Te sava ñayuu cáhīn yūcuan ní cacahān jīn de:
¿Na vé cúu jeē casáha ró jeē cándají ró burro jiñā?
achí i.

⁶ Yūcuán na te ni cacahān de nájnūhun ni cachi Jesús. Te ni casiáá i tī vējicoo de jīn tī.

⁷ Te ni ndecoo de jīn tī nuū Jesús, te ni casoó de sahma de siquī tī, te ni jecosō yā tī.

⁸ Te cuehē ñayuu ni cascáá i sahma i ini ichi. Te sava ga i ni cajehnde i ndaha ñúú, te ni cachucun i ini ichi ún.

⁹ Te ñayuu cuango ichi núu jīn ñayuu cuango ichi yátá, cácana jee i:

Yōhyo cújéhnū ya. Yōhyo vāha Yaā cúu Yaā jeē véji jīn jniñu máá Jítóho yō Yaā Dios.

¹⁰ Te yōhyo luu coo, chí je yajni ndacu ya jniñu nájnūhun ni ndacu jí yō rey David. Te yōhyo cújéhnū máá Yaā Dios. Achí i.

¹¹ Te ni quiví Jesús ñuu Jerusalén, jīn ini templo cáhnu. Te ni jito ya nuū tǎcá ndajniñu yúcu ní yúcu. Te ni quenda ya cuahān yā ñuu Betania jīn ndihúxí uū de, chí je ni ini.

*Jeē ni cáhān yā nuū yújnu higo
(Mt. 21.18-19)*

¹² Te inga quiví ún, nuū ní quenda ya ñuu Betania cuahān yā jīn de, te jí yā sōco.

¹³ Te nde jicá ni jito ya ñn nundēhe higo jeē ín ndaha. Te ni jecondēhe yá núu sanaa te nihīn yā ndehē caji yā. Te tú na vé ni níhín yā, chí máá ndaha-ni ín. Chí nasūu tiempo ndehē cúu.

14 Yūcuán na te ni cahān yā nuū yujnu ún:

Tuá na ndehē cuun cuiti xinī rō jeē cáji ñayuu, achí yá.

Te tēe cáscuáha jíin yá ni cajini de jeē súcuan ni cahān yā.

Jeē ní quenehen ya ñayuu ini templo

(Mt. 21.12-17; Lc. 19.45-48; Jn. 2.13-22)

15 Te ni najinū yā jíin de ñuu Jerusalén. Te ni quivī ya ini templo cáhnu, te ni quenehen ya ñayuu cájeen quitī te cánaxīco núū ñayuu jeē socō i. Te ni scotúú ndeyī ya tāca mesa tēe cástáyī xūhún, jíin silla tēe cáxīcō paloma.

16 Te tu ní jéhe ya jnūhun jeē yáha ñayuu ini templo jíin ndajníñu ndíso i.

17 Te ni steén yā jnūhun nuū i, achí yá:

Yósó núū tútu ii jeē cahán Yaā Dios: Vehe ri chi vehe nuū cájicān tahuñ ñayuu tācá nación cúu, achí yá. Te máá rō jijnáhan rō chi nájnūhun yaū cava ñacuīhna ní canasáha rō, achí yá.

18 Te tēe cástéén tutu ley Yaā Dios jíin sūtū cácujuhnu, ni cajini de jnūhun yáha, te ni quejéé de cánducú de modo ndese cahni de ya. Chi cáyūhú de jeē ndujéhnu ga maá yá vēsú maá de, chi tāca ñayuu yōhyo cácusī ni i cájini i jnūhun stéén yā.

19 Te jeē cuácuaa, te ni quenda ya ñuu Jerusalén cuahān yā.

Jeē ni íchī nundēhe higo

(Mt. 21.20-22)

20 Te jenéhen inga quivī ni nayāha ya jíin de cuahān yā. Te ni cajito de jeē nundēhe higo un je ni íchī nde yoho.

21 Yūcuán na te ni nucūhun ni Pedro, te ni cahān de jíin yá:

Maestro, cundēhe ní nundēhe higo jeē ni cáhān ni núū, te vijna je ni ichī caján, áchí de.

22 Te ni cahān Jesús jíin de:

Candíje ró jéē sáha Yaā Dios jeē jicán rō.

23 Chi jendaá cahán rī jíin ró, núu ndé ñáyuu cahān i jeē cújiyo yucu yáha quihīn nde nuū mar, te núu tú nacani siquī ni i, chi sa suhva candíje i jeē cóo nájnūhun ni cahān i, yūcuán na te cundaā jeē ni jíicān i.

24 Jeē yúcuan cáhān rī jíin ró, tāca jéē cacán tahu rō, te núu candíje ró jéē nihín rō, te nihín rō.

25 Te jeē cájicān tahu rō, te cone cáhnu ni rō nuū ñáyuu casáha cuēchi siquī rō, návāha máá Tátá rō jeē ndeé yá andiví, suni cone cáhnu ni yā nuū cuēchi ró.

26 Chi núu tú cone cáhnu ni rō nuū jnáhan ró, te suni máá Tátá rō jeē ndeé yá andiví, ma cóne cáhnu ni yā nuū cuēchi ró, áchí yá.

Siquī jeē ndíso jniñu Jesús

(Mt. 21.23-27; Lc. 20.1-8)

27 Yūcuán na te ni najinū tucu ya ñuu Jerusalén. Te jíca cuu ya ini templo cáhnu. Te sutū cácujuhnu jíin téé cástéén tutu ley Yaā Dios jíin téé jéhnú cándacu jniñu, ni quecoo de nuū yā.

28 Te ni cacajnūhún de ya:

¿Ndeé ní nihín jniñu ró jéē sáha ró jniñu yáha? ¿Te ndé ñn ni tee jniñu siquī rō jeē sáha ró súcuan? áchí de.

29 Te ni cahān Jesús:

Suni ruhū, cajnūhun rí rohó ñn jnūhun jíjnáhan ró. Te núu cuu stío cuíñí rō, yūcuán na te cachi rī nuū rō ndé ní nihīn jniñu ri jeē sāha ri jniñu yáha.

³⁰ ¿Ndé ñn ni tee jniñu síquī Juan jeē ni scuándute de? ¿A Yaā Dios chí táca téé? Cachi nuū rī, achí yá.

³¹ Yūcuán na te ni candajnūhun máá de:

Núu cahān yō jeē Yaā Dios ni tee ya jniñu un síquī Juan, te cahān de jíin yó: Núu súcuan ¿te najehē tu ní cácadíje ró de?

³² Te núu cahān yō jeē ñáyuu ni catee jniñu un síquī de, te quitī ni ñayuu nuū yō, achí de cácahān máá de.

Chí cáyūhú de jeē quitī ni ñayuu, chí ndivii i cácadíje i jeē téé ni nacani jnūhun Yaā Dios ni cuu ndije Juan.

³³ Jeē yúcuan ní cacahān de jíin yá:

Tu cájini rī, achí de.

Yūcuán na te ni cahān Jesús:

Ni ruhū, suni ma cáchi rī nuū rō ndé ñn ni tee jniñu síquī rī sāha ri jniñu yáha, achí yá.

*Jnūhun yátá síquī tēe néé cásajniñu nuū uva
(Mt. 21.33-46; Lc. 20.9-19)*

12

¹ Te ni quejéé yá cahán yā jnūhun yátá jíin de jíjnáhan de:

Ñn tēe ni nachuhun de cuehē uva, te ni jesi de corral, te ni sāha de ñn nuū cūhun ndehē un táxīn. Te ni sāha de ñn vehe súcún návāha cuu coto de ní cáhnu.

Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi cuahān jicá de.

² Te máá tiempo ndutútú uva, te ni tají de ñn mozo de cuanuq̄hin sava uva nuū tée cásájniñu ún.

³ Te tēe un ní cajññ de mozo un, te ni cacani de i, te ni canatají de i cuanuhun i súcuan-ni.

⁴ Yūcuán na te tēe chíí uva un ní tají tucu de inga mozo cuahān. Te tēe cásájniñu un ní cajēhe de yuū xinī mozo un, te ni castújí de, te ni cacahān ndevāha de nuū.

⁵ Te tēe chíí uva ni tají tucu de inga mozo cuahān. Te ni cajehni de i. Te suni súcuan ni tají de cuehē gā mozo cuahān, te sava i ni cacani de, te sava i ni cajehni de.

⁶ Te tēe chíí uva, íyó ñn sēhe de jeē maní ndasí de jíín. Te jeē sándīhí na ni tají de sēhe de un cuahān nuū tée cásájniñu. Te jéni ní de: Tēe ún chi cuatáhú de jíínáhan de nuū sēhe ri.

⁷ Te tēe cásájniñu un ní cacahān maá: Tēe chíí táhū cúu jeē yáha. Na cáhni yō de, te ndōo tahū de cuu máá yó, achí.

⁸ Te ni cajññ de i, ni cajehni de i, te ni cascáne de i inga lado. Achí yá.

⁹ Yūcuán na te ni cajññhun yá de:

Núu súcuan ¿te ndese sáha tēe chíí uva un? Ndihi de te cahni de tēe cásájniñu ún, te cuāha de ññhun cáá uva un núu inga sava tēe sájniñu nuū.

¹⁰ ¿Te á ná tu cahu ró jññhun yáha jeē yosó núu tútu ññ, jeē ruhū cúu nájññhun ññ yuū? Chi áchí tutu: Yuū jeē ní casquéhichī tēe cájeni vehe, yuū yáha nduu jeē quítuu vehe.

¹¹ Máá Jítóho yō Yaā Dios ni sáha ya súcuan, te cánaa ni yō jíto yó jññu yáha. Achí tutu, achí yá.

12 Yūcuán na te ni canducú de modo jn^h de ya. Chi ni cajecūhun ni de jeē siquī maá de cúu jnūhun yátá ní cahān yā siquī tée cásajniñu nuū uva jíin tée cájeni vehe. Te siquī jeē cáyūhú de jeē quitī ni ñayuu, te ni castóo de ya te cuango de.

Siquī xūhun renta

(Mt. 22.15-22; Lc. 20.20-26)

13 Yūcuán na te ni catají de sava tēe grupo fariseo jíin tée grupo Herodes cuango de nuū yā, ndúcú de ndese sáha de návāha cahān yā ñn jnūhun jeē nihín de cuēchi siquī yā.

14 Te ni quecoo de, te ni cacahān de jíin yá:

Maestro, cájini na jéē tée cáhán ndaā cúu ní, te tu yúhú ní jeē cahán ni ñn ñayuu siquī ní. Chi tu sáha ní cuenta ndese cúu ñn ñn i, chi ñnuú-ni sáha ní jíin i. Te stéén ndaā ní ndese squícu ñayuu nuū Yaā Dios. ¿Te á íyó váha jeē chúnaa yō renta nuū rey nación Roma jeē jn^h nación yō, chí tuú? ¿A chúnaa yō, chí má chúnaa yō? Achí de jíin yá.

15 Te máá yá jiní yā jeē stahú-ni de, te ni cahān yā jíin de:

¿Najehē cájito ndee rō ruhū? Cuāha ñn xūhún na cóto rí, achí yá.

16 Te ni cajēhe de xūhún. Te ni jito ya, te ni cajnūhun yá de:

¿Ndé ñn nuū cúu jeē ndeé nuū xūhun yáha, te ndé síhví cúu jeē ndeé yāhá?

Te ni cacahān de jíin yá:

Nuū jíin síhví rey un cúu, achí de.

17 Yūcuán na te ni cahān yā jíin de:

Núu súcuan te nacuāha ró núū rey un jēē yīhi cuenta nuū de, te nacuāha ró núū Yaā Dios tāca jēē yīhi cuenta nuū maá yá, achí yá.

Te ni canaa ni de ni cajini de jeē ndichí ní cahān yā.

*Jeē ní cacajnūhún de siquī jeē nátecu ndīyi
(Mt. 22.23-33; Lc. 20.27-40)*

¹⁸ Yūcuán na te jecu tēe grupo saduceo ni quecoo de nuū yā. Te tēe un cácahān jeē tu nátecu cuiṭi ndīyi. Te ni cacahān de jíin yá siquī ñn jnūhun, áchí de:

¹⁹ Maestro, Moisés ni tee de nuū tútu jeē cánevāha yó: Núu ñn tēe cuu de, te ndōo ñasihí de, te núu tu ní íyo sēhe de jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuñī i nuū ndīyi ñani de, áchí tutu.

²⁰ Núu súcuan te ni íyo uxā ñani. Te tēe núu ní quijnáhan de jíin ñahan. Te ni jihī de, te tú sēhe de ní íyo.

²¹ Te tēe uū ni naquihin de ña, te suni ni jihī de, te tú sēhe de ní íyo. Te suni súcuan tēe unī.

²² Te ndihúxá de ni condeca de ña, te ni ñn de tú sēhe de ní íyo. Te jeē sándīhí te suni ni jihī ñahan ún.

²³ Núu súcuan te núu na nátecu de jíjnáhan de quiṽi nátecu ndīyi, ¿te ndé ñn de cuu ña ñasihí de? Chí ndihúxá de ni condeca de ña. Achí de jíin yá.

²⁴ Yūcuán na te ni cahān yā jíin de:

Yōhoyo cástívi ró jnūhun siquī jeē tu cájecūhun ni rō jeē cahán tutu iī, ni tu cájini rō jeē iyó poder Yaā Dios jeē nastécu yā ndīyi.

25 Chi quivī nátecu ndīyi, te tuá na jnūhun qui-jnáhan tēe jíin ñahan coo. Chi coo i nájnūhun ndajéhé Yaā Dios andiví.

26 Te siquī jeē nátecu ndīyi, ¿á tu ní cácahu ró tutu ní tee Moisés, ndese ni cahān Yaā Dios jíin de mēhñu yúcū jeē cayú yáñuhūn? Máá rí cúu Yaā Dios Abraham jíin Isaac jíin Jacob, achí yá jíin Moisés.

27 Chi vēsú je ni cajihī de, te cátecu de nuū iyó máá yá, chí cúu ya Yaā sáha jeē técu ñayuu ní cáni. Yōhyo cástiví ró jnūhun núu súcuan. Achí yá jíin de.

*Jniñu cánuú ndasí gá jeē ní ndacu Yaā Dios
(Mt. 22.34-40)*

28 Te ni quee ñn tēe stéén tutu ley Yaā Dios, te ni jini de jeē castíchí jnáhan tēe un jíin Jesús. Te ni jini de jeē váha ni nastió cuñí yá jnūhun. Te ni cajnūhún de ya:

¿Ndé ñn cúu jnūhun ndácu jniñu cánuú ndasí gá nuū tāca gá jniñu ni ndacu ya jenahán? áchí de.

29 Te ni cahān Jesús jíin de:

Yáha cúu jniñu jeē cánuú ndasí gá nuū tāca gá. Achí tutu: Ñayuu Israel, cuni nahín ró. Máá Jítoho yō Yaā Dios, máá ñn-ni ya iyó.

30 Núu súcuan te coo manī ndasí ró jíin máá Jítoho rō Yaā Dios, nde jnáā ndasí ró sáha ró ndihí jeē cúshí ni yá, nde jíin ini jíin ánuá rō, jíin ní jeē níjnūní rō, jíin ní fuerza rō. Yáha cúu jniñu ndácu ya jeē cánuú ndasí gá.

31 Te jniñu uū jeē ní ndacu ya, suni súcuan cáhán: Cundáhú ni rō jnáhan ró nájnūhun cundáhú ni rō máá ró. Tuá inga jnūhun ndácu jniñu cánuú gá iyó, chí suu máá jé yáha-ni. Achí yá jíin de.

32 Yūcuán na te ni cahān tēe stéén tutu ley jíin yá:
Váha ni cahān ní, Maestro. Chi ndaā chi íyó ñn-ni
Yaā Dios, te tuá na inga yā iyó.

33 Te cánuú jéē coo manī ndasí yó jíin yá nde jíin
ini jíin ánuá yō, jíin ní jeē níjnūní yō, jíin ní fuerza
yō, te cundáhú ni yō jnáhan yó nájnūhun cundáhú
ni yō maá yó. Te cánuú ndasí gá jeē yáha vésú jeē
cáhmú yó quiti jíin táca gá jeē socó yō nuū yā. Achí
de jíin yá.

34 Yūcuán na te ni jini Jesús jeē váha ni stió cuñí
de, te ni cahān yā jíin de:

Je yajni cuu quivi ró ndaha Yaā Dios jeē ndacu
ya jniñu nuū rō, achí yá.

Yūcuán na te ni ñn ga de, tuá ni chūndeyí ni de
cajnūhún de ya.

Siqui jeē cúu Cristo sēhe yucūn David
(Mt. 22.41-46; Lc. 20.41-44)

35 Te stéén Jesús jnūhun ini templo, te ni cahān
yā:

¿Ndese cúu jeē cácahān tēe cástéén tutu ley Yaā
Dios jeē Cristo cúu sēhe yucūn David?

36 Chi máá David suhva ni cahān de jnūhun ya ni
sáha Espíritu Santo nde jenahán:

Máá Jítóho yō Yaā Dios ni cahān yā jíin Jítóho rī, Yaā
quiji:

Cucōo ró lado váha ri nuū kujéhnú ró,
te na sáha ri jeē quende rō poder táca jéē cájito uhū
rohó.

Achí Yaā Dios. Achí David.

37 Te núu sēhe yucūn David cúu Cristo, ¿te ndese
cúu jeē ni cáhān de jeē Jítóho de cúu ya? áchí yá.

Te ñayuu cuehē, cánujnahan ni i cájini nahín i táca
jnūhun cáhān yā.

*Jeē ni cahān yā jeē iyó cuéchi de jijnáhan de
(Mt. 23.1-36; Lc. 11.37-54; 20.45-47)*

³⁸ Te stéén yā jnūhun, te ni cahān yā jíin i:

Coto má candíje ró táca tée cástéén tutu ley. Chi cácusī ni de cáñuhun de sahma cáni jeē steén jeē cujéhnū de, cájica cuu de jíin. Te cánujnahan ni de jeē cahán yīñúhún ñáyuu jíin de ini calle.

³⁹ Te cánujnahan ni de cucōo de nuū silla yīñúhún gá ini vehe iī sinagoga, jíin silla yīñúhún gá nuū víco cáyeji ñáyuu.

⁴⁰ Te cáquende de vehe ñahan ní caquendōo ndáhú. Te nahán cájicān tahu de návāha cani ni ñáyuu jeē tú na cuéchi de. Tēe yáha jíjnáhan de chi xeēn gā ndoho de castigo. Achí yá.

*Jeē ni sócō ñahan viuda xūhún
(Lc. 21.1-4)*

⁴¹ Te iin quivī néne Jesús ini templo ichi núú tāca yéjnū nuū casocō i xūhún. Te jíto ya ndese cáchuhun ñáyuu xūhún ini yejnū ún. Te cuehē ñáyuu cucá ní cachuhun i cuehē xūhún.

⁴² Te ni quee iin ñahan viuda jeē ndóho ndáhú. Te ni chuhun ña uū centavo lulí ini yejnū ún.

⁴³ Yūcuán na te ni cana ya tēe cáscuáha jíin yá, te ni cahān yā jíin de:

Jendaá cahán rī jíin ró jeē cuehē gā cúu jeē ni sócō ñahan viuda ndahú yáha, vēsú jeē ní casocō tāca ñáyuu cucá.

⁴⁴ Chi tācá i ni casocō i jeē ni ndóo siquī xúhun cuéhē i. Te ñahan yáha, vēsú ndahú ndóho ña, te ni chuhun ndihī ña jeē cótecu ña. Achí yá jíin de.

*Jeē ní cachi yā jeē náā templo
(Mt. 24.1-2; Lc. 21.5-6)*

13

¹ Te ni quenda Jesús ini templo cáhnu, te ñn tēe scuáha jíin yá ni cahān de:

Maestro, condēhe ní ná luu jíto tācá vehe yáha jēē cúu templo, jíin táca yūū jeē ní cuvāha, áchí de.

² Te ni cahān yā jíin de:

Tācá vehe náhnu yāha jēē cájito ró, chí ma cóso jnāhan ga ni ñn yuū, chí ndihí jnanū. Achí yá.

Na seña coo nuū cuácuyajni ndihí ñayiví

(Mt. 24.3-28; Lc. 21.7-24; 17.22-24)

³ Te ni jehēn yā jíin de yucu Olivos jeē íne ichi núú templo cáhnu. Te ni cucōo ya yūcuán. Te Pedro jíin Jacobo jíin Juan jíin Andrés ni cacajñūhun síin de ya:

⁴ Castūhun ní nuū ná, ¿ndé quiví coo tāca jēē ní cachí ní jēē coo? ¿Te na seña coo núu cuacuyajni squícu tāca jēē ni cáhān ní? áchí de.

⁵ Te ni cahān yā jíin de:

Coto ró jēē ma stahú ni ñn de róhó.

⁶ Chí quijicoo cuehē tēe jeē stahú jíin síhví rí. Máá rí cúu Cristo, achi de. Te súcuan stahú de cuehē ñayuu.

⁷ Te nihīn rō jnūhun jeē tāca lado iyó guerra, chí je yajni coo guerra. Te ma yūhu ró, chí cánuú coo súcuan. Te ni ná tu jinū quiví ndihí ñayiví.

⁸ Chí ndonda nación siquī inga nación, te ndonda ñuu siquī inga ñuu jeē cuajñāhan. Te cháha chúcuan jnāa, te coo jnamā, te ndonda ñayuu siquī jnāhan í. Te tāca jēē yáha cácuu jnūndóho quejéé xíhna ñúhún gá.

⁹ Te condito ró máá ró, chí nastúu i róhó núū tāca tóhō, te ini tācá vehe ñ sinagoga caní i róhó. Te

quindeca i sava ró núū tācá gobernador jíin núū tāca rey, te cahān i cuēchi siquī rō siquī jeē cá candíje ró rúhū. Te súcuan te cuu nacani ró jnúhun ri nuū de.

¹⁰ Te jíni ñúhún jeē xíhna gā cuitē núu jnúhun nuū tācá nación ndese jnáma ri i, te sáa te ndíhi quiṽi.

¹¹ Te núu ni cajni de róhó cuángoo de jíin ró nuū tāca tóhō, te ma nácani ni rō xíhna gā ndese stío cuiñí rō nuū de te cācu ró. Chi máa hora un te máa Yaā Dios cuāha ya jnúhun nuū rō ndese cahān rō, te jnúhun ún cahān rō. Chi nasūu máa ró cúu jeē cahān, chi Espíritu Santo cúu jeē cahān.

¹² Te ñani jíin ñani nastúu jnáhan jeē na cúu. Te tátá nastúu sēhe jeē cúu. Te sēhe ndonda siquī tatá jíin náná jeē cahni.

¹³ Te tāca ñáyuu quiṽi ni i nuū rō jeē siquí ruhū. Te ñáyuu cuiñi ñihin jíin jnúhun ri nde quiṽi jínu, chi cācu i.

¹⁴ Te Daniel, tēe ni nacani jnúhun Yaā Dios, ni tee de jnúhun ñn tēe néé jeē quiṽi. Te róhó jeē cácahu tutu ún, na jécūhun ni rō. Chi ñn quiṽi te cuni rō jeē sáha ndevāha de jeē stívi de tācá ndajníñu iñi ini templo, te cuiñi de nuū tú na ley cuiñi de. Te núu cuni rō jeē súcuan cúu, te ñáyuu cáyūcú región Judea, na cúnu i caa i yucu quingoo i.

¹⁵ Te ñáyuu cáyūcu núū quéhe, ma ndívi i ini vehe jeē quénehen i ndajníñu i, chi cánuú cunu yachī i návāha cācu i.

¹⁶ Te ñáyuu cáhīin nuū ítu, ma ndíji i vehe jeē quiṽi i sahma i.

¹⁷ Te quiṽi ún nacā jeē ndahú ñahan cáñuhun sēhe jíin ñahan cándeca yiquín, chi ma cúnihin ña cunu yachī ña.

18 Te cacān tahu rō jeē ma quíji jnūndóho un jēē cunu ró máá tiempo cúun yuhvā.

19 Chi jeē quejéé un te coo cuehē jnūndóho xeēn, jeē ná tu coo súcuan nde quivī ní sáha Yaā Dios ñayiví te nde vijna. Te jeē ndíhi jnūndóho ún te ni ma cóo ga jeē súcuan.

20 Te núu tú nastíyi máá Jítóho yō Yaā Dios tiempo jnūndóho ún, te ni ñin ñayuu ma cácu cuiti i. Te jeē siquí ñáyuu cá candíje jeē ní nacāji ya, jeē yúcuan nastíyi ya tiempo un.

21 Núu súcuan te núu ñin ñayuu cahān jín ró: Yāhá condēhe ró íne Cristo, chí: Yūcuán condēhe ró íne ya, achi i, te ma candíje ró jēē cahān i.

22 Chi canecoo tēe cástáhú te cahān de jeē Cristo cúu de, chí cáhān de jeē tēe nácani jnūhun Yaā Dios cúu de. Te sáha de jniñu jéhnú jeē naa ni ñayuu coto i, návāha stáhú de nde máá ñáyuu ní nacāji ya, te núu na cúu.

23 Te ndíto na cóo ni rō, chi je ni castūhun rí nuū rō vijna nde ná tu coo.

*Ndese coo quivī ndiji Yaā ní nduu tēe
(Mt. 24.29-35, 42-44; Lc. 21.25-36)*

24 Te quivī ún, núu je ni ndíhi jnūndóho ún, te cujnúú níandii, te yoō ma ndíí gā.

25 Te ñingoo quími ín andiví. Te tāca jēē ín andiví chi quisi i.

26 Yūcuán na te coto ñayuu nuū máá rí, Yaā ní nduu tēe, ndiji ri jín vícō, te condiso ri cuehē poder, te yōhyo luu cujéhnú ri.

27 Yūcuán na te tají rí ndajéhé rí quinastútú yá ñayuu ní nacāji ri ndicúún lado ñayiví, nde nuū ndíhi ñayiví te nde nuū ndíhi andiví.

28 'Vijna te scuáha ró ndese sáha nundēhe higo: Núu je ni nane numa, te ni najee ndaha, te cájini rō jeē jé ni cuyajni tiempo jihni.

29 Te suni súcuan núu ni cajini rō jeē ní quejéé cúu tācá jniñu jeē ni cáhān rī, yūcuán na te na jécūhun ni rō jeē ní cuyajni quivī ndíji ri, te yachī coo.

30 Jendaá cahán rī jiín ró jeē ma cúu ndihi ñayuu jeē cóto jnūndóho ún, chi nde squícu ndihi jniñu ún.

31 Andiví jiín ñáyiví chi naa, te tāca jnúhun cáhān rī chi ma náā, chi ndihi squícu.

32 'Te quivī jiín hora jeē ndíji ri, tú ni ñn ñayuu jiní, ni máá ndajéhé cáhīyo andiví, ni máá rí, Sēhe Yaā Dios. Chi máá ñn ni Tátá rī cúu jeē jiní.

33 'Núu súcuan te na cócuhun ni rō tāca jnúhun yáha, te ndito na cóo ni rō, te cacān tahu rō, chi tu cájini rō na quivī ndiji ri.

34 Chi coo nájnūhun ñn tēe jeē quihín jicá de, te nde ná tu quenda de vehe de, te ni ndacu de jniñu nuū tāca mozo de ndese sáha ñn ñn de. Te ni ndacu de jniñu nuū téé ndíto yéhyí jéé na cóndito de.

35 Te suni súcuan róhó jíjnáhan ró, ndito na cóo ni rō. Chi cúu ri nájnūhun jitohe vehe ún, te tu cájini rō na hora ndiji ri, á jéé cuácuaa, chí ñuú, chí jéé cána líhli, chí jénéhen.

36 Chi ñn sanaa-ni te ndiji ri, te coto ró jéé ma nánihīn rī rohó jéé tu ndíto ró.

37 Te jnūhun cáhān rī jiín ró jijnáhan ró, suni cáhān rī jiín ndivii ñayuu: Ndito na cóo ni rō jijnáhan ró. Achí yá.

*Jeē ní casquíjnáhan de jnūhun jeē jn# de Jesús
(Mt. 26.1-5; Lc. 22.1-2; Jn. 11.45-53)*

14

¹ Te cúmanī uū gā quivī te quejéé vico pascua jeē cáyeji ñayuu hebreo pan jeē tú na levadura yíhi. Te sutū cácujeñhu jíin tée cástéén tutu ley, ni canducú de modo ndese jñi de Jesús jíin jnúhun stáhú, te cahni de ya.

² Te ni cacahān de:

Ma jñi yó de máá quivī vico, chi ndonda ñayuu siquī yō, achí de.

*Jnúhun ñahan jeē ní chuhun perfume xinī yā
(Mt. 26.6-13; Jn. 12.1-8)*

³ Te íne Jesús ñuu Betania vehe Simón, tēe ni ndoho cuehyī stehyú. Te níni yéji yā staā, te ni quee ñn ñahan nuū yā, ndáhá ña ñn frasco yuū luu jeē ñúhun aceite perfume, jeē máni ita nardo cúu, te yōhyo yahu ndéé. Te ni tahú ña frasco un, te ni chuhun ña xinī yā.

⁴ Te sava tēe cáhīn yūcuan ní caquitī ni de, te ni cacahān de:

¿Najehē cúu jeē náā saá-ni perfume jiñā?

⁵ Chi cuu xīcō yahu yó víhyá gā unī ciento denario, te cuāha yo núū ñáyuu ndahú núú, achí de.

Te ni cacahān sōó de jíin ña.

⁶ Te ni cahān Jesús:

Ma stáhān rō ña. ¿Naun cásáha ró jeē nácani uhū ni ña? Chi ñn jniñu váha cúu jeē ni sáha ña jíin rí.

⁷ Chi níni coyūcu ñáyuu ndahú jíin ró, te núu cácuñi rō te cuu sáha vāha ró jíin i. Te ruhū chi tuá condee rī jíin ró.

⁸ Chi ni sáha ña ndiñi jeē cuu sáha ña jeē maní ña jíin rí. Chi nde ná tu quindūji ri te je ni sátūhva ña ruhū jeē ní chuhun ña perfume ruhū.

9 Jendaá cahán rī jín ró jeē ní cáhnu ñayīvi ndé-ni cúu nuū cuité núu jnūhun jeē jnáma ri ñayuu, suni nacani i jnūhun jeē ní sáha ñahan yáha, návāha cocuhun ni ñayuu ña, áchí yá.

Jeē ní nastúu Judas yā
(Mt. 26.14-16; Lc. 22.3-6)

10 Yūcuán na te Judas Iscariote, ñn jeē ndihúxí uū tēe cáscuáha un, ní jehēn de nuū sutú cácujuhnu, ní sándaā de jín jéē nastúu de Jesús nuū jijnáhan.

11 Te nuū ní cajini sōho sutū un jéē cahán de, te ni cacusī ni, te ni cajejnūhun jeē cuáha xūhun núu de. Te nde quivī un ní nducú de modo ndese nastúu de ya.

Jeē ní jequin yā Cena yā
(Mt. 26.17-29; Lc. 22.7-23; Jn. 13.21-30; 1 Co. 11.23-26)

12 Te ni quee máá quivī jeē quejéé vico pascua jeē cáyeji ñayuu pan jeē tú na levadura yíhi, te suni quivī un cájehni i londe nájnūhun ni ndacu Yaā Dios jniñu jeē sáha i vico pascua un. Te tēe cáscuáha un ní cacajnūhún de ya:

¿Ndé nuū cuní ní jéē quisátūhva ná cuxíni ní vico pascua? achí de.

13 Te ni tají yá uū tēe cáscuáha ún quingoo de, te áchí yá jín de:

Cuángoo nde ñuu, te yūcuán najnáhan ró jín ñn tēe ndíso quiyī ndute. Te condiquin rō de quihīn rō jín de.

14 Te vehe jeē ndívi de, yūcuan cáhān rō jín tēe chíí vehe: Achí máá Maestro: ¿Ndé ñn cúu cuarto vehe ní cuáha núu ní núu cuxíni ya vico pascua jín tēe cáscuáha jín yá? achi rō.

15 Te máá de stéén de ñn cuarto cáhnu nde xinī véhe jeē je íyó túhva. Te yūcuan sátūhva ró jēē cuxíni yó, áchí yá jíin de.

16 Te cuangoo tēe cáscuáha ún, te ni jinūcoo de ñuu, te ni canihīn de nájñūhun ni cahān yā jíin de. Te ni casátūhva de jeē cuxíni ya vico pascua.

17 Te jeē cuácuaa, te ni quee ya jíin ndihúxí uū de.

18 Te ni cacucōo de mesa cáyeji de staā, te ni cahān yā:

Jendaá cahán rī jíin ró jeē ñn róhó jēē yéji jíin rí, nastúu ro rúhū, achí yá.

19 Yūcuán na te ni cacucuíhyá ni de, te ná ñn ná ñn de ni cacajnūhún de ya:

¿A sáña cúu? áchí ñn de.

Te suni súcuan inga de:

¿A sáña cúu? áchí ñn ñn de.

20 Te ni cahān yā jíin de:

Ñn jeē uxí uū rō jeē cáyeji cáhnu jíin rí ñn cohō, suu nastúu ruhū.

21 Te ruhū, Yaā ní nduu tēe, jendaá cúu jeē quihín rī cuu rī, nájñūhun yósó jñúhun rí nuū tútu iī. Te nacā xeēn ndoho tēe nastúu ruhū. Vāha ga núu tu ní cácu tēe un núú, áchí yá.

22 Te níní cáyeji de jíin yá, te ni quihin ya pan, te ni nacuatáhú yá, te ni tahú cuéché yá, te ni jēhe ya nuū tēe cáscuáha jíin yá. Te ni cahān yā:

Caji rō jijnáhan ró, chi yāha cúu yiqui cúñu rī, achí yá.

23 Yūcuán na te ni quihin ya ñn copa ndūxi uva, te ni nacuatáhú yá, te ni jēhe ya ni cajihí ndihí de.

24 Te ni cahān yā jíin de:

Yāha cúu niñī rī jeē cuáha rí jeē cúu contrato jeé, te cati jeē ndundoo cuēchi cuehē ñayuu.

25 Te jendaá cahán rī jín ró jeē ndé vijna te ma cóho ga rī ndūxi ndehē uva yāhá, chi nde quiji quiṽí ndacu Yaā Dios jniñu ní ñayṽí, te sáá te coho tucu ri jín ró jijnáhan ró. Achí yá.

Jeē ní cachi yā jeē yūhu Pedro cahān de jeē jiní de ya

(Mt. 26.30-35; Lc. 22.31-34; Jn. 13.36-38)

26 Te ni jita ya ñn yaa iī jín de jijnáhan de. Te ni quenda ya cuahān yā jín de nde yucu Olivos.

27 Yūcuán na te ni cahān yā:

Ndivii rō nayūhu ró jeē siquí ruhū jecuáā vijna. Chi suhva je yósó jnúhun ri nuū tútu iī, ni cahān Yaā Dios: Cuāha ri jnúhun jeē cáhni ñayuu tēe ndíto lanchi, te lanchi un cuítē núu ti jeē yūhu tí, achí.

28 Te jeē nátecu rī, te xihna ruhū cosnúu rí quihīn rī región Galilea, te sáá te najinūcoo ró, áchí yá.

29 Yūcuán na te ni cahān Pedro:

Vēsú ndihí de na náyūhú de, te máá ná chi ma náyūhú cuiti ná, áchí de jín yá.

30 Te ni cahān yā jín de:

Jendaá cahán rī jín ró jeē jecuáā vijna, nde ná tu cana líhli uū jínu, te yūhu ró jeē jniñ ñayuu rohó, te unī jínu cahān rō jeē tu jíní rō ruhū, achí yá.

31 Te ni cahān teyí de jín yá:

Vēsú núu cuu na jín ní, te ma cahán cuiti na jēe tu jíní na níhín, áchí de.

Te suni súcuan ni cacahān ndihí de.

Jeē ni jícān tahú yā nuū huerto Getsemaní

(Mt. 26.36-46; Lc. 22.39-46)

32 Yūcuán na te ni jinū Jesús jín tēe cáscuáha jín yá ñn lugar nuū naní Getsemaní. Te ni cahān yā jín de:

Yáhá-ni cucōo ró, te na quíhín rī cacān tahu rī, achí yá.

³³ Te ni jeca ya Pedro jíin Jacobo jíin Juan, cuahān yā jíin de. Te ni quejéé yá cucuíhyá ndasí ni yā te cúxíí ni yā jeē quiji jnūndóho siquī yā.

³⁴ Te ni cahān yā jíin de:

Yōhyo cucuíhyá ni rī, te ndúcú sáha jeē cúū rī. Yáhá condetu ró te condito ró, áchí yá.

³⁵ Te ni jica ya jecu gā, te ni jecuñī yití yá ni jequin ya nuū yā nuū ñúhun. Te ni jicān tahu yā nuū Yāā Dios jeē núu cuu te ma ndóho ya jnūndóho jeē quejéé quiji siquī yā.

³⁶ Te suhva ni cahān yā:

Tátá maá ná, ndíhi-ni jniñu cuu sáha máá ní. Te tejiyo ní jnūndóho yáha jéē ma quiji siquī ná. Te nasūu jéē cuní maá ná, chí jeē cuní maá ní na cóo, áchí yá.

³⁷ Te ni ndee yā nuū ndinúní tée cáscuáha jíin yá, te ni jito ya jeē cáquixī de. Te ni cahān yā jíin Pedro:

Simón, ¿á quíxí rō? ¿A tu ní cánda ró condito ró jíin rí vēsú ñn hora?

³⁸ Coó ndito ni rō te cacān tahu rō jeē chindéé ñáhán yá rohó jeē ma sáha ró cuéchi jeē coto ndee jeneé rohó. Chí cúní ndije ánuá rō squícu vāha ró, te yiquí cúñu rō chí tu fuerza, achí yá.

³⁹ Te ni jehēn tucu ya, ni jicān tahu yā, te suni jnūhun yúcuán ní cahān yā.

⁴⁰ Te ni ndee ya nuū de, te ni jito ya jeē cáquixī tucu de, chí yōhyo cájiī de māhná. Te tuá ni cánihīn de jnūhun stío cúñí de nuū yā.

⁴¹ Te ni ndee yā jeē vuelta unī, te ni cahān yā jíin de:

Vijna te cusū rō te ndetātu ró. Te tuú chi je ni cuu, chi je ni quee hora, te ruhū, Yaā ní nduu tēe, natūu ri te jñi tēe cáhīyo cuēchi ruhū.

⁴² Ndocuiñi jijnáhan ró, chi je vēji tēe nastúu ruhū, te quihīn yō jín de. Achí yá.

Jeē ní cajñi de Jesús

(Mt. 26.47-56; Lc. 22.47-53; Jn. 18.2-11)

⁴³ Te sá cáhán gā yā súcuan, te ni quee-ni Judas, ñn jnáhan jeē uxí uū tēe cáscuáha jín yá. Te vējicoo cuehē tēe jín de, cándaha de espada jín yujnu. Chi sutū cácujuhnu jín tēe cástéén tutu ley jín tēe jéhnú cándacu jniñu, ni catají de tēe ún.

⁴⁴ Te Judas, tēe nástúu ya ún, je ni jēhe de ñn seña nuū tēe un jijnáhan, chi ni cachi de:

Tēe jeē téchūhu rí un cúu. Te jñi ró jijnáhan ró quihīn rō jín, te ma siaá cuiñi rō, achí de.

⁴⁵ Te ni quee de nde nuū Jesús, te ni cahān de jín yá:

Maestro, Maestro, achí de.

Te ni techūhú de ya.

⁴⁶ Te tāca gá tēe un ní cajñi de ya, te cuango de jín yá.

⁴⁷ Te ñn tēe íne jín yá ni tava de espada de, te ni jehnde de sōho ñn mozo maá sūtū cujéhnú ga.

⁴⁸ Te ni cahān Jesús jín ñáyuu cuehē ún:

¿Te va tēe cuihná cúu ri jeē véjicoo ró jín espada jín yujnu jñi ró rúhū jeē súcuan?

⁴⁹ Tāca quívī ni ine ri jín ró jijnáhan ró ini templo cáhnu, ni steén rī jñūhun, te tu ní cájñi ró rúhū. Te súcuan cásaha ró návāha na squícu jeē cahān tutu ñi, achí yá.

50 Yūcuán na te ndihi tēe cáscuáha jíin yá, ni castóo de ya, ni cajinu de cuango de.

Tēe suchí jeē ní jinu

51 Te ñin tēe suchí, ndíquín de ya cuahān de jíin yá. Te ndí de máá ñin sahma cuitá. Te ni cajni tēe ún de.

52 Te máá sahma cuitá un ní canihīn. Te ni jinu máá ñi-ni de cuahān de.

*Jeē ní indichi Jesús nuū junta tēe cácujeñhu ga
(Mt. 26.57-68; Lc. 22.54-55, 63-71; Jn. 18.12-14, 19-24)*

53 Yūcuán na te ni jinūcoo de jíin Jesús nuū sutū cujeñhu ga. Te táca sūtū cácujeñhu jíin tēe jēñhu cándacu jniñu jíin tēe cástéén tutu ley, ni candutútú de.

54 Te Pedro chi jíca-ni ndíquín de ya, te ni jinū de nde ini patio sutū cujeñhu ga. Te ni cucōo de jíin táca policía, násaā de ñuhūn.

55 Te sutū cácujeñhu jíin ndihi tēe cásáha junta cujeñhu ga, ni canducú de cuēchi siquī Jesús, chi cahni de ya cáconi de. Te tu ní canihīn de.

56 Chi cuehē de ni cacahān yaá siquī yā, te tu ní quíjnáhan jnūhun ni cacahān de.

57 Yūcuán na te ni candocuiñi sava de, te ni catee de cuēchi siquī yā, achí de:

58 Máá ná ni cajini ná cáhán de jeē canu de templo yáha jēe ní cuvāha ni casáha tēe, te nuū uní quivī te nacani de inga jeē násūu jíin ndaha tēe cuvāha, achí de. Achí jíjnáhan.

59 Te ni jnūhun yáha tu ní quíjnáhan tucu jeē cácahān de siquī yā.

⁶⁰ Yūcuán na te sutū cujéhnū ga ni ndocuiñi de nuū ñáyuū cuehē ún, te ni cajnūhún de Jesús:

¿Naun tu cáhán cuiṭi rō? ¿A íyó ndáā jeē cácahān tēe yáha síquī rō? achí de.

⁶¹ Te máá yá tu ní cáhán cuiṭi yā, chi tú na vé ni stíó cuiñí yā. Te sutū cujéhnū ga ni cajnūhún tucu de ya:

¿A máá ró cúu Cristo, Sēhe Yaā vāha jeē cujéhnū? áchí de jíin yá.

⁶² Te ni cahān yā:

Suu ri cúu. Te coto ró jēē ruhū, Yaā ní nduu tēe, condee rī lado váha Yaā iyó poder, te ndiji ri ichi ándiví jíin vícō, achí yá.

⁶³ Yūcuán na te sutū cujéhnū ga ni jehnde de sahma de jeē quití ndasí ni de, te ni cahān de:

¿Ndé jíni ñūhún gá yō testigo núu súcuan?

⁶⁴ Chi je ni cajini ró jēē cahān de jnūhun ndevāha jeē quití ni Yaā Dios, chi sáha de máá de Sēhe Yaā Dios. ¿Te ndese cájeni ni rō? Achí de.

Te ndihi de ni cacahān jeē na cúu yā.

⁶⁵ Te sava de ni catesihí de nuū yā, te ni cajesi de sahma nuū yā, te ni cacani de ya. Te cácahān de jíin yá:

Cachi ndé ñn cúu jeē ní cani rōhó, achí de.

Te tāca tēe policía ni cacani de nuū yā.

Jeē ní cachi Pedro jeē tu jíni de ya

(Mt. 26.69-75; Lc. 22.56-62; Jn. 18.15-18, 25-29)

⁶⁶ Te íne Pedro ini patio ichi chíji nuū cáhān de jíin Jesús. Te ni quee ñn ñahan jéjníñu vehe sutū cujéhnū ga ún.

⁶⁷ Te ni jito ña nuū de jeē néne de násaā de yuñūhún. Te ni jito vāha ña nuū de, te ni cahān ña:

Róhó chi suni ni jica ró jín Jesús, tēe ñuu Nazaret, achí ña.

⁶⁸ Te máá de tu ní cáchi de, chi ni cahān de:

Tu jíní rī de, ni tu jíní rī na jnūhun cáhán rō, achí de.

Te ni quenda de yéhyí núū quéhe. Te ni cana-ni líhli.

⁶⁹ Te ñahan jéjníñu un ní jito tucu ña nuū de, te ni quejéé ña cáhán ña jín ñáyuu cáhīn yūcuán:

Tēe yáha suni jnáhan tāca tēe un cúu, achí ña.

⁷⁰ Te máá de tu ní cáchi tucu de. Te ni cunúu jecu gā, te ñayuu cáhīn yūcuan ní cacahān tucu i jín Pedro:

Jendaá ndije jeē suni jnáhan de cúu ró, chi tēe Galilea cúu ró, te inuú-ni cáhán rō jín de jínáhan de. Achí i.

⁷¹ Yūcuán na te ni quejéé de cáhán teyí de jeē na cóndee cuēchi siquī de núu tu cáhán ndaā de:

Tu jíní rī tēe un jéē cácahān rō jnūhun de, achí de.

⁷² Yūcuán na te ni cana-ni líhli vuelta uū. Te ni nucūhun ni de jnūhun ni cahān Jesús jín de: Nde ná tu cana líhli uū jínu, te yūhu ró te cahān rō unī jínu jeē tu jíní rō ruhū. Te ni nacani ni de siquī jnúhun ún, te ni ndahyū de.

Jeē ní indichi Jesús nuū Pilato

(Mt. 27.1-2, 11-14; Lc. 23.1-5; Jn. 18.28-38)

15

¹ Te jeē ní cundijin, te sutū cácujuhnu ni candutútú de jín tēe jénu cándacu jniñu, jín tēe cástéén tutu ley, jín ndihí tēe cása ha junta cujénu ga, te ni casquíjnanhan de jnūhun. Te ni cajihni de Jesús, te cuango de jín yá nuū Pilato, tēe cúu gobernador.

2 Te Pilato ni cajnūhún de ya:
 ¿A máá ró cúu Rey ñayuu hebreo? achí de.
 Te ni cahān yā:

Suu ri cúu, nájñūhun cáhán rō.

3 Te sutū cácujuhnu un ní cacahān de cuehē
 cuēchi siquī yā.

4 Te Pilato ni cajnūhún tucu de ya:

¿Naun tu cáhán cuiṭi rō? ¿A tu jíni ró jéē cuehē
 cuēchi cácahān de siquī rō? achí de.

5 Te tu ní cáhán cuiṭi yā ni ññ jñūhun jíin de. Te
 nahán ní naa ni Pilato ndéhé de nuū yā.

Jeē ní cundaā jeē cúu yā

(Mt. 27.15-31; Lc. 23.13-25; Jn. 18.38-19.16)

6 Te íyó costumbre Pilato jeē quiṽí víco un siaá de
 ññ tēe íne vecāa, núu na-ni tēe cácuñi ñayuu.

7 Te íyó ññ tēe nání Barrabás, íne de vecāa jíin táca
 jnáhan de siquī jeē ní candonda de siquī tohō te ni
 cajehni de ndīyi.

8 Te ni quecoo ñayuu cuehē, te ni cacahān i jíin
 Pilato jeē na sáha de nájñūhun íyó costumbre de.

9 Te ni cahān Pilato jíin i:

¿A tu cácuñi rō jeē siaá rī tēe cúu Rey rohó ñayuu
 hebreo? achí de.

10 Súcuān ni cahān de, chi cúni de siaá de Jesús.
 Chi je ni jecūhun ni de jeē ní cacucuéśún ni táca
 sūtū un cájito de ya, te jeē yúcuān ní quiijicoo jíin
 yá nuū de.

11 Te sutū cácujuhnu un ní cascáhán de ñayuu
 cuehē un jéē váha ga na cácan i jeē siaá Pilato
 Barrabás.

12 Yūcuān na te ni cajnūhún tucu Pilato:

Núu súcuan ¿te ndese cáconi rō jeē sáha ri jíin tée jeē cácahān rō jeē cúu de Rey rohó ñáyuu hebreo? áchí de jíin i.

¹³ Te ni cacana jee i:

Cata caa ní de jicā cruz, na cúu de, áchí i.

¹⁴ Te ni cahān Pilato:

¿Na cuēchi ni sáha de núu súcuan?

Te ñáyuu un ní cacana jee tucu i:

Cata caa ní de jicā cruz, na cúu de, áchí i.

¹⁵ Te Pilato cuní de jeē na cúsh ni ñáyuu jíin de, te ni siaá de Barrabás. Yūcuán na te ni ndacu de jniñu jeē na cáni tācá soldado Jesús, jíin jéē cata caa de ya jicā cruz.

¹⁶ Yūcuán na te soldado un cuángoo de jíin yá ini patio palacio, jeē sácatā de nuū yā. Te ni canastútú de ndíhi jnáhan de.

¹⁷ Te ni cachuhun de ya ñin sahma cuehé ndíhí jéē cúu sahma rey. Te ni casáha de ñin corona iñu, ni cachuhun de xinī yā.

¹⁸ Yūcuán na te ni cacana de:

Nacā jeē váha rey cúu Rey ñáyuu hebreo, achí de.

¹⁹ Te ni cacani de yujnu xinī yā, te ni catesihí de nuū yā, te ni cajecuiñi yití de nuū yā, casáha de jeē chiñúhún de ya.

²⁰ Te nuū ní cuu ni casácatā de nuū yā, te ni catava de sahma cuehé ndíhí un, te ni canachuhun de ya sahma máá yá. Te ni caquenehen de ya jeē cata caa de ya jicā cruz.

Jeē ní cacata caa de ya jicā cruz

(Mt. 27.32-44; Lc. 23.26-43; Jn. 19.17-27)

21 Te ñn tēe nání Simón ñuu Cirene, tēe cúu tátá Alejandro jíin Rufo, vendiji de jeē ni jéhēn de rancho. Te ni yāha de yūcuán, te ni catejníñu soldado un de jeē cóndiso de cruz yā.

22 Te cuango de jíin yá ñn lugar nuū naní Gólgota, jeē cuní cahān Lugar Yiquí Xíní.

23 Te ni cajēhe de vino jeē ni sácā núu jíin súde uvuā jeē cóho ya, te tu ní jíhi ya.

24 Te ni cacata caa de ya jicā cruz. Te ni casáha de sorteo jeē siquí ndese nihīn ñn ñn de sahma ya.

25 Te cahīn ni cacata caa de ya.

26 Te jnūhun ni catee de xinī cruz cahán na siquí ni jihī yā: Yāha cúu Rey ñayuu hebreo, achí.

27 Te suni ni cacata caa de uū tēe cuíhná núu uū gā cruz, ñn de lado váha ya, te inga de lado jecó yā.

28 Te ni squícu jnūhun cáhán tutu iī: Ni casquíjnhan de ya jíin tēe casáha neé, achí.

29 Te ñayuu cáyāha yūcuán cáscuícó i xinī i, te cácahān neé i:

Jājaān. Róhó chí cáhán rō jeē cánu rō templo cáhnu, te nuū uní quivī te nucondichi sáha ró.

30 Núu súcuan te jnama ró máá ró, te nuu ró jicā cruz viī, achí i.

31 Te suni súcuan ni cacahān catá sutū cácujuhnu jíin tēe cástéén tutu ley, te achí de cácahān maá de:

Núu inga ñayuu ni jnama de, ¿te naun tu cúu jnama de máá de vijna?

32 Núu na cúni yō jeē Cristo, Rey ñayuu Israel, nuu de jicā cruz vijna, yūcuán na te candíje yó, achí de jíjnhan de.

Te tēe cándita caa jíin yá, suni súcuan ni cacahān neé de.

*Jeē ni jīhī Jesús**(Mt. 27.45-56; Lc. 23.44-49; Jn. 19.28-30)*

³³ Te nuū ní cuu cahuxī uū, te ni cunee ní cáhnu nde cahunī.

³⁴ Te nuū ní cuu cahunī, te ni cana jee Jesús:

Eloi, Eloi, ¿lama sabactani? achí yá. Te jnūhun un cúní cahān: Yaā Dios maá ná, Yaā Dios maá ná, ¿naun ni stóo ní sáña?

³⁵ Te sava ñayuu cáhīn yūcuan, ní cajini i jnūhun ún, te ni cacahān i:

Cuni nahín, chí cána de xinī Elías, tēe ni nacani jnūhun Yaā Dios jenahán, achí i.

³⁶ Te ni jinu ñn tēe, ni jechundaji de cachī nuū vinagre iyá. Te ni tee de xinī ñn yujnu, te ni tee de yuhu ya jeē cóho ya. Te ni cahān de:

Na cóndēhe yó núu quiji Elías nasnúu de, áchí de.

³⁷ Te máá Jesús ni cana jee ya, te ni jihī-ni ya.

³⁸ Yūcuán na te sahma ndíta caa jeē ndihyú cuarto īi ini templo cáhnu, ni ndatā sava sava nde xinī te nde nuū jehé.

³⁹ Te tēe ñuu Roma jeē cúu capitán, índichi de nuū yā, te ni jini de jeē ní cana jee ya te ni jihī yā. Te ni cahān de:

Jendaá ndije jeē Séhe Yaā Dios cúu tēe yáha, áchí de.

⁴⁰ Te suni cáhīn sava ñahan, cándēhe jíca ña. Te unī ña cácuu María ñuu Magdala, jíin María naná José jíin Jacobo suchí, jíin ñahan nání Salomé.

⁴¹ Te ñahan yáha ní candiquīn ña ya, ni cajejníñu ña nuū yā nde náa jíca ya Galilea. Te suni cáhīn cuehē gā ñahan jeē ni jéngoo jíin yá ñuu Jerusalén.

*Jeē ní quindūji Jesús**(Mt. 27.57-61; Lc. 23.50-56; Jn. 19.38-42)*

⁴² Te ni ini quivī ún. Te quivī sátūhva cúu, chi sajnē cúu quivī ndétātú.

⁴³ Te ni quee José, tēe ñuu Arimatea. Te cúu de ñn tēe cújéhnú nuū junta cujéhnú ga. Te suni ñúhun ni de jeē quiji quivī jeē ndacu Yaā Dios jniñu. Te tu yúhú de chi ni quivī de nuū Pilato, ni jicān de yiqui cúñu Jesús.

⁴⁴ Te Pilato chi náā ni de jeē yachí ni jihī yā. Te ni cana de capitán, te ni cajnūhún de tēe un núu je ni jihī yā.

⁴⁵ Yūcuán na te ni cucáhnú ni de jeē ni cáhān capitán jíin de, te ni jēhe de jnūhun jeē quihin José yiqui cúñu yā.

⁴⁶ Te José ni jeen de ñn sahma cuitá váha. Te ni snúu de yiqui cúñu yā, te ni chusúcún de sahma ún. Te ni chindūji de ya ini ñn yaū jeē quíndūji ndīyī, jeē ní caan jicā ñn cava. Te ni jesi de ñn yuū yuhu yáú un.

⁴⁷ Te María ñuu Magdala, jíin María naná José, ni cajito ña nuū ní cachindūji de ya.

Jeē ní natecu Jesús

(Mt. 28.1-10; Lc. 24.1-12; Jn. 20.1-10)

16

¹ Te ni ini quivī ndétātú, te María ñuu Magdala, jíin María naná Jacobo, jíin Salomé, ni cajeen ña tācá perfume jeē quíchuhun ña yiqui cúñu yā.

² Te jenéhen quivī domingo, jeē ní cane niāndii, te ni jinūcoo ña nuū ní yindūji ya.

³ Te cácahān ña:

¿Nde níhīn yō tēe tejiyo yuū ndihyú yuhu yáú? áchí ña.

⁴ Te ni candacoto ña, te ni cajito ña jeē jé ni cujiyo yuū cáhnu un cuáhān.

⁵ Te ni quivicoo ña ini yaū ndīyi. Te ni cajito ña in ndajéhé Yaā Dios jeē cáa nájñūhun tēe suchí, néne ya ichi lado váha, ñūhun ya in sahma cuijín cáni. Te ni cayūhú ña.

⁶ Te ni cahān yā jíin ña:

Ma yūhu ró jijnáhan ró. Chi vecondēhe ró Jesús ñuu Nazaret, Yaā ni jíhī jicā cruz. Tuá yā yāhá, chi je ni natecu yā. Yāhá condéhé ró nuū ní cachindūji de ya.

⁷ Cuánungoo te cachi rō nuū tēe cáscuáha jíin yá, jíin núū Pedro, jeē xíhna gā maá yá jinū Galilea, te sáa te najinūcoo de. Te yūcuán coto de nuū yā, nájñūhun ni cahān yā jíin de nde saá, áchí yá jíin ña.

⁸ Yūcuán na te ñahan un ní quendacoo ña nuū ní yindūji ya, te cájino ña cuangoo ña. Chi quísí i ña jeē cáyūhú ña. Te tu ní cácachi cuiñi ña nuū ní in, chi cáyūhú ña.

*Jeē ní nane Jesús nuū María ñuu Magdala
(Jn. 20. 11-18)*

⁹ Te Jesús ni natecu yā jenéhen quiví domingo. Te xíhna gā ni nane ndijin yā nuū María ñuu Magdala, ñahan jeē ní quenehen ya uxā tachí ini.

¹⁰ Te cuahān ña cuacastūhún ña nuū tāca tēe ni cajica jíin yá jeē ní nane ya nuū ña. Te cácuaihyá ni de te cándahyū de.

¹¹ Te nuū ní cajini de jñūhun jeē ní jito ña nuū yā jeē técu yā, te tu ní cácandíje de jñūhun cáhān ña.

*Jeē ní nane ya nuū uū tēe cáscuáha jíin yá
(Lc. 24.13-35)*

12 Yūcuán na te ni quendacoo uū jnáhan tēe ún, cájica de cuahān de íchi rancho, te sīn modo ni nane ndijin yā nuū de.

13 Te ni canandicó de, ni cacastūhún de nuū tāca gá jnáhan de. Te ni tu ní cá candíje tucu jnáhan de jeē cácahān ndindúú de.

*Jeē ní tejníñu ya de nacani de jnūhun
(Mt. 28.16-20; Lc. 24.36-49; Jn. 20.19-23)*

14 Te cúcuéé gá te ni nane ndijin yā nuū ndihúxí ñn de jeē cáyūcú de mesa cáyeji de staā. Te ni cahān yā nuū de, chi nīhni ni de jeē tu cá candíje de jeē cácahān jnáhan de un, jéē ní natecu yā ni cajito de ya.

15 Te ni cahān yā jíin de:

Cuángoo jíjnéhan ró ní ñayíví, te nacani ró jnúhun ri nuū tāca ñáyuu ndese jnáma ri i.

16 Te ñayuu candíje te cuandute i, chi cācu i. Te ñayuu tú candíje, chi jnahnū ndetū i.

17 Te ñayuu candíje, sáha i tācá jniñu jéhnu yáha jeē steén jeē iyó rí jíin i: Jíin síhví rí quenehen i tachī ini ñayuu. Te cahān i tijni yuhu jéé.

18 Te núu ni jñi sanaa i coō, chí núu ni jñi i veneno, te ma sáha daño jíin i. Te suni soó i ndaha i síquí ñáyuu cácuñu, te nduvāha. Achí yá jíin de.

*Jeē ní ndaa ya cuanuhun yā andiví
(Lc. 24.50-53)*

19 Yūcuán na te nuū ní ndihni ni cahān maá Jítóho yō jíin de jíjnéhan de, te ni ndaa ya cuanuhun yā andiví, te ni cucōo ya lado váha Yaā Dios nuū cujéhnu ya.

20 Te máá de ni quendacoo de, ni canacani de jnúhun ya tāca lado ndese jnáma ya ñayuu. Te máá

Jítóho yō ni chindéé ñáhán yá de. Te ni jēhe ya fuerza jeē sáha de tǎcá jniñu jéhnú jeē steén jeē iyó ndáá jnūhun cánacani de. Te ni cuu. Amén.

Nuevo Testamento en mixteco
New Testament in Mixtec, Atatláhuca (MX:mib:Mixtec,
Atatláhuca)

copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

Copyright Information

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Atatláhuca

© 1973, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
9665e546-39d0-5bd5-8b10-38916a94951f